

ՀԱՅ ԺՈՂՈՎՐԴԻ ԿԱԶՄԱՎՈՐՄԱՆ ԸՆԹԱՑՔԸ

ՀՍՍՀ ԳԱ ակադեմիկոս Ս. Տ. ԵՐԵՄՅԱՆ

Վերջին ժամանակներս հայագիտության հիմնական հարցերից մեկն է դառնում հայ ժողովրդի ժագման խնդիրը: Այս հարցով են զբաղվում հայագետ բանասերները՝ լեզվաբաններն ու պատմաբանները, հնագետներն ու մարդաբանները, սակայն բազմաթիվ հարցեր տակավին մնում են չլուսաբանված և կարոտ են նոր մեկնաբանման ու հետազոտությունների: Հայկական էթնոսի առաջացման խնդիրը պետք է դիտել երկարատև ժամանակաշրջանի և ընդարձակ տարածության մեջ, հաշվի առնելով նրան հարևան և ցեղակից էթնիկական կազմավորումները: Հայկական էթնոսի կազմավորման սկիզբը գալիս է հեռավոր ժամանակներից, երբ մարդկությունը ցեղ էթնիկական ընդհանրությունից անցնում էր ժողովուրդը բնորոշող էթնիկական ընդհանրության:

Էթնոսը բնորոշող ամենահիմնական հատկանիշը լեզուն է, որը հնարավորություն է տալիս թափանցելու տվյալ ժողովրդի կորիզը հանդիսացող ցեղի պատմական կյանքի առավել վաղ ժամանակաշրջանները: Հայոց լեզվի պատմության ուսումնասիրությունը պատմա-համեմատական լեզվաբանության լույսի տակ հնարավորություն է տալիս պարբերացման ենթարկելու հայ ժողովրդի կազմավորման երկարատև ընթացքը: Հայոց լեզվի պատմությունը լուսաբանում է հայ ժողովրդի հնդեվրոպական բաղադրատարրի գոյությունը մ. թ. ա. IV հազարամյակում: Վերջին ժամանակների լեզվաբանական ուսումնասիրությունների այդ նախնական ժամանակաշրջանի հետևյալ պատկերն են տալիս:

Բալկանյան թերակղզում և Առաջավոր Ասիայում հաստատված հնդեվրոպական լեզուներով խոսող ցեղերի նախնական բնակության տերիտորիան ընդգրկում էր Սև ծովից դեպի հյուսիս և հյուսիս-արևմուտք գտնվող ցածրավայրերը: Հայերի հնդեվրոպական նախնիները, պատկանելով թրակական լեզվախմբին, տեղադրվում են տրիպոլյան կուլտուրայի շրջօղակում¹: Վերը նշված տարածություններից մ. թ. ա. IV հազարամյակում շարժվել են դեպի Փոքր Ասիա խեթերի հնդեվրոպական նախնիները, ապա «նախահունական» թրակապելասդյան ցեղերը՝ դեպի Բալկանյան թերակղզու հարավը, Կրետե և Կիպրոս կղզիները, այնուհետև Փոքր Ասիայի հարավային ծովափը, որտեղից նրանք թափանցում են նույնիսկ Հայկական լեռնաշխարհի հարավ-արևմտյան շրջանները: Վերջերս լեզվաբանների ուշադրությունն է գրավել թրակապելասդյան «նախահունական» լեզվի առնչությունը հայոց լեզվին: Թրակապելասդյան լե-

¹ Տե՛ս Ա. Я. Брюсов, Очерки по истории племён Европейской части СССР в неолитическую эпоху, М., 1952, էջ 254: Տե՛ս և Е. К. Черныш, Некоторые локальные особенности племён трипольской культуры (գեկուցում՝ կարգացված Մոսկվայում, մարդաբանական և ազգագրական գիտությունների VII միջազգային կոնգրեսում):

գրությունների և հայերենի համեմատական ուսումնասիրությունը բուլղարական գիտնական Վլադիմիր Բեորգիևին բերում է այն եզրակացության, որ «նախահունարենը (պելասգերենը) ալբաներենի և հայերենի միջև գրավում է միջանկյալ դիրք թե՛ աշխարհագրական տեսակետից և թե՛ հնչյունական զարգացման առանձնահատկություններով»²։ Այս եզրակացությունների լույսի տակ իր պատմականությունն է ստանում Ստրաբոնի (XI, 4, 8) կողմից պահպանված ավսոնդությունը հայերի բնօրրանի մասին թեսալիայում, որը կոչվում է Պելասդիոտիս և համարվում է պելասգների հայրենիքը։

Հայերենի և պելասգերենի («նախահունական») առնչությունների ուղղությամբ կատարված նախնական ուսումնասիրությունը ցույց է տալիս, որ հայերեն լեզվի ուսումնասիրման ժամանակ, բացի խեթա-լուվիական լեզուներից, պետք է հաշվի առնել նաև թրակա-պելասգյան լեզուներով խոսող ցեղերը, որոնք Կիլիկիայի կողմից Կիզիկատնայի (անտիկ Կատանիայի) վրայով թափանցում էին Հայաստան-Ազգի ցեղային միության տերիտորիան և որոշ փոխադրեցությունների մեջ մտնում այնտեղ բնակվող ցեղերի հետ։ Թրակա-պելասգյան լեզուներով խոսող ցեղերի ազդեցությունը նշմարվում է Հայկական լեռնաշխարհի տեղաբնիկների լեզվի, պաշտամունքի և տեղանունների ու ցեղանունների մեջ։

Ժամանակագրական տեսակետից թրակա-պելասգյան ցեղերը ավելի շուտ են թափանցել Հայկական լեռնաշխարհի հարավ-արևմտյան սահմանամերձ վայրերը, և միայն նրանցից հետո է տեղի ունեցել թրակա-փոյուղական լեզուներով խոսող ցեղերի ներթափանցումը դեպի Փոքր Ասիա և Հայկական լեռնաշխարհ։ Թրակա-փոյուղական ցեղերից ավելի շուտ հարավ-ուստական տափաստաններից դեպի Իրանի և Հնդկաստանի խորքերն էին շարժվել հնդիրանական ցեղերը, որոնք նույնպես որոշ ազդեցություն են թողել հայկական էթնոսի ձևավորման վրա։

Էգեյան աշխարհից մինչև հեռավոր Հնդկաստան ձգվող տերիտորիաների վրա հաստատված հնդեվրոպական լեզուներով խոսող ցեղերը սերտ հարաբերությունների մեջ են մտնում տեղաբնիկ ցեղերի հետ, ընդ որում հնդիրանական ցեղերը ստեղծում են փոխազդեցությունների ուրույն աշխարհ, իսկ նրանցից արևմուտք գտնվող Հայկական լեռնաշխարհում, Փոքր Ասիայում և էգեյան աշխարհում տեղի էին ունենում հնդեվրոպական մի քանի ցեղակից լեզվաընտանիքների փոխազդեցություններ։ Այդ փոխազդեցությունների արևմտյան ծայրամասում էին գտնվում Բալկանյան թերակղզու հարավային մասը և Կրետե կղզին, որտեղ գերիշխող էին «նախահունական» թրակա-պելասգյան ցեղերը, որոնց հիմքի վրա էլ ձևավորվեց հելլենական աշխարհը, իսկ արևելյան ծայրամասումն էր Հայկական լեռնաշխարհի խուրի-ուրարտական էթնիկական կազմավորումների միջավայրը, որը մտավ երկարատև փոխազդեցությունների ոլորտը խեթա-լուվիական և թրակա-փոյուղական հնդեվրոպական ցեղերի հետ։ Խուրի-ուրարտական և հնդեվրոպական ցեղերի բաղմամբիլ և բաղմաձև փոխազդեցությունների կոնկրետ զրահորումն եղավ հայկական էթնոսի առաջացումը։ Հայկական լեռնաշխարհի խայտաբղետ ցեղային կազմավորումներին պիտի փոխարիներ հայ ժողովուրդը, իբրև մեկ միասնական ժողովուրդ, իր միասնական լեզվով, տերիտորիայով և պետությամբ։

² В. И. Георгиев, Исследования по сравнительно-историческому языкознанию, М., 1958, էջ 92։

Իրավամբ կարելի է ասել, որ հայ ժողովուրդը Հայկական լեռնաշխարհի առաջին իրական և կայուն ժողովուրդն է³։ Լեզվական, հնագիտական, մշակութային, ազդեցրական և առհասարակ պատմական աղբյուրների բազմակողմանի պրայտումները բերում են այն աներկբա եզրակացության, որ հայ ժողովուրդը սկսել է կազմավորվել Հայկական լեռնաշխարհում դեռևս այն ժամանակաշրջանից, երբ այդ տերիտորիայի վրա և նույնիսկ նրա շուրջը գոյություն չունեին հնդեվրոպական լեզուներով խոսող ցեղեր և ժողովուրդներ։ Հայ ժողովուրդը իր ֆիզիկական կերպարանքով պատկանում է արմենոիդ մարդաբանական տիպին, որին պատկանում էին Հայկական լեռնաշխարհի ամբողջ տերիտորիայով տարածված տեղաբնիկ խուրի-ուրարտական ցեղերը։ Նույնը պետք է ասել հայերի մշակութային ավանդույթների մասին։ Սակայն լեզվի խնդրում մեծ ներդրում են արել եկվոր հնդեվրոպական տարրերը։ Սրանց ցեղային լեզուներն են, որ Հայկական լեռնաշխարհում միազոգվելով, սկիզբ են դրել հայոց լեզվի ձևավորմանը։ Հին և նոր հայերենի ու նրա բարբառների ուսումնասիրությունը վերջնականապես ցույց է տվել, որ հայոց լեզվի կորիզը պատկանում է հնդեվրոպական լեզվաընտանիքին։ Բայց այն ժողովրդի լեզու է դարձել տեղաբնիկ խուրի-ուրարտացիների և այլ ցեղերի լեզուներից մեծապես ազդվելով ու նրանց բառամթերքի հաշվին խիստ հարստանալով միայն։

Հայ ժողովրդի ձևավորման ընթացքը, որը տեղի է ունեցել Հայկական լեռնաշխարհի տերիտորիայի վրա, սկսվում է մ. թ. ա. II հազարամյակի կեսերին և ավարտվում է հայկական պետականության առաջացմամբ մ. թ. ա. VII դարի վերջերին և VI դարի սկզբներին։ Ժողովրդաառաջացման և լեզվաստեղծման այս երկարատև պրոցեսը սկսվում է Փոքր Ասիայի արևելյան մասում ու Հայկական լեռնաշխարհի արևմուտքում և ավարտվում է ընդգրկելով ամբողջ երկիրը, որը այնուհետև կոչվում է «Հայք» կամ «Հայաստան», իսկ օտարների մոտ՝ «Արմինա», «Արմենիա»։

Հայ ժողովրդի ձևավորման ընթացքը տնցել է չորս հիմնական փուլ և դրանցից յուրաքանչյուրը կապված է պատմական Հայաստանի տերիտորիայի չորս կենտրոնների հետ, որոնք են. ա) Բարձր Հայք՝ Արևմտյան Եփրատի հովտում (Հայասա-Ազգի), բ) Ծոփք-Աղձնիք՝ Արևելյան Եփրատ-Արածանիի և Արևմտյան Տիգրիսի հովիտներում (Արմե-Շուպրիա), գ) Վանա լճի ավազանը (Բիալինի-Արամայր-Հայոց ձոր), դ) Արարատյան դաշտավայր։

Էթնա-լեզվական վերոհիշյալ փոխազդեցությունների ամենահին և հիմնական օղակներից մեկն է Հայասա-Ազգի ցեղային միությունը, որը մ. թ. ա. II հազարամյակի կեսերից սկսած զգալի դեր է կատարում Հայկական լեռնաշխարհի քաղաքական և էթնիկական պատմության բնագավառում։ Ներկայումս գերիշխող է դարձել այն տեսակետը, ըստ որի հայ ժողովրդի ձևավորման համար որպես հիմք ծառայած հնագույն էթնիկական խումբը եղել է ցեղերի քաղաքական այն միավորումը, որը հայտնի է խեթական արձանագրություններից Հայասա-Ազգի անունով։ Ե. Ֆոռերի⁴, Գ. Ղափանցյանի⁵, Պ. Կրեշ-

³ Ս. Երեմյան, Հայկական լեռնաշխարհի հնագույն ժողովուրդը, «Սովետական Հայաստան» ամսագիր, 1966, № 10 (247), էջ 19—20։

⁴ E. Forrer, Hajassa-Azzi, „Caucasica“, Leipzig, 1931, № 9.

⁵ Гр. Капанцян, Хайаса—колыбель армян. Этногенез армян и их начальная история, Ереван, 1947.

մերի⁶ և այլոց հետազոտությունները ապացուցեցին, որ խեթական արձանագրությունների Haiaša անունից է առաջացել «հայ» ցեղանունը (haia կամ haio + sa), որը կապվում է խեթա-լուվիական լեզվաշխարհի հետ:

Մեզ հետաքրքրող երկիրը խեթական արձանագրություններում անվանվում է կամ «Հալաշա քաղաքի երկիր» կամ «Աղզի քաղաքի երկիր». այստեղից կարելի է եզրակացնել, որ երկիրը կոչվել է իր քաղաքային կենտրոնների անունով: Թիլ-Հայասա քաղաքը տեղադրվում է հավանաբար հին հայկական Թիլավանի տեղում, նախաքրիստոնեական դարաշրջանում այստեղ գտնվում էր նաև դիցուհու տաճարը: Այս տեղորոշումը ցույց է տալիս, որ Հայասա երկրի կորիզը և նրա սկզբնական տերիտորիան եղել է հին հայկական Եկեղյաց գավառը՝ անտիկ դարաշրջանի Ակիլիսենեն և համապատասխանում է Երզնկայի դաշտին: Թիլավանը տեղադրվում է այդ դաշտի կենտրոն Երիզա կամ Արիզա (հետագայում՝ Երզնկա) քաղաքից ոչ հեռու, որի տեղում, հավանորեն, գտնվելիս է եղել Հայասա երկրի մյուս կենտրոնը՝ Աղզի քաղաքը: Նախաքրիստոնեական դարաշրջանում այստեղ էր գտնվում Անահիտ դիցուհու պաշտամունքի վայրը:

Հայասա-Աղզի երկրի այս տեղադրությունը ընդունում է հայագետների մեծ մասը: Սակայն կան և առարկություններ⁷:

Տարբեր տեսակետների առաջացման հիմնական պատճառներից մեկն է հայասական Առիպսա քաղաքի տեղորոշման հարցը, որը ըստ Մուրշիլ Բ-ի (մ. թ. ա. 1345 թ.) տարեգրության, «գտնվում էր ծովի մեջ»:

Խեթական աղբյուրի այս վկայությանը տարբեր մեկնություններ են տրվել. ոմանք գտնում են, որ խոսքը Տրապիզոնի և Կերասունտի շրջակայքի սևծովյան եզերքի մասին է, մյուսները Առիպսան փնտրում էին Վանա լճի ափին⁹ կամ Վերին Եփրատի ակունքների մոտ, Կարին-էրզրումից ոչ հեռու գտնվող ամրության վայրում¹⁰, կամ, վերջապես, Ծովք (Իեջուկ) լճի (որից սկիզբ է առնում Արևմտյան Տիգրիսը) ափին¹¹: Սակայն այս հարցով ղեկավարող դիտնականները հաշվի չէին առնում Հայասա-Աղզիի մյուս այն քաղաքների մասին եղած տեղեկությունները, որոնց տեղորոշումը ի վերջո բերում է մեզ նույն Վերին Եփրատի հովիտը: Այս հանգամանքը հաշվի առնելով, Ն. Ադոնցը հանգել է այն ճիշտ եզրակացության, որ Առիպսա քաղաքը պետք է տեղագրել ներկայիս Դենիզլի գյուղի տեղում, Դիվրիգի (միջնադարյան Տիւրիկէ, Տյուրիկ) քաղաքից ոչ հեռու, Գյուլդաղ լեռան ստորոտում¹²: Դենիզլի գյուղը, որի անունը

⁶ E. Kretschmer, Die nationale Name der armenier Haikh, „Anzeiger der Akad. der Wiss. in Wien, phil.-hist. Klasse“, 1932, № 1—7. Հայերեն ամփոփումը տե՛ս «Հանդես ամսօրյա», 1937, № 7—8, էջ 420—432:

⁷ Տե՛ս Nicolas Adontz, Histoire d'Arménie, Paris, 1946, էջ 27—41; Շ. Երեմյան, К вопросу об этногенезе армян, „Вопросы истории“, 1951, № 7, էջ 101—108:

⁸ Հայասա-Աղզին Սև ծովի մերձափնյայն ափին են տեղադրել մի քանի հետազոտողներ, որոնց թվումն է նաև Ի. Մ. Դյակոնովը, տե՛ս նրա Предыстория армянского народа, Ереван, 1968, էջ 81—84:

⁹ Հ ա կ ո ր Մ ա ն ա ն դ յ ա ն, Քննական տեսություն հայ ժողովրդի պատմության, հատ. Ա, Երևան, 1944, էջ 32:

¹⁰ Гр. Капанцян, նշվ. աշխ., էջ 59:

¹¹ Լ. Բ ա ր ս ե դ յ ա ն, Նայասա-Աղզիի ու նրա մի քանի բնակավայրերի տեղադրման հարցի շուրջը, «Պատմա-բանասիրական հանդես», 1963, № 3, էջ 310—311:

¹² N. Adontz, նշվ. աշխ., էջ 39—40:

թուրքերեն նշանակում է «ծովագյուղ», գտնվում է Ճահճոտ վայրում, որտեղ նախկինում պետք է որ լիճ եղած լինի, այդ մասին է վկայում նաև Գյուղաղ լեռան անունը, որը թուրքերեն նշանակում է «լճի լեռ»:

Հայասա-Աղզի ցեղային միության մյուս բնակավայրերը ևս տեղորոշվում են Փոքր Հայքի և երբեմն նրա մասը կազմող Բարձր Հայքի տերիտորիայում: Առիպսայից ոչ հեռու գտնվում էին Դուկկամա կամ Դուկկարամա (ներկ. Դոզան գյուղը, անտիկ Դագոնան) և Զիմառիա (ներկ. Զիմառա) քաղաքները: Այս բնակավայրերից բացի, խեթական աղբյուրները Հայասա երկրում հիշատակում են Ուռա «քաղաքը»՝ «Հայասա երկրի գլխավոր ամրոցը...»¹³: Թիլ-Հայասա և Աղզի քաղաքներից հետո երկրի խոշոր կենտրոններից էին Կումմախա կամ Կամմուխա (ներկ. Կամախ)¹⁴ և Ինգալավա-Թարխիզամա (Թորգոմա, հետագայում Թորդան) քաղաքները: Այս ժամանակաշրջանում պետք է գոյություն ունեցած լինի և հին հայկական Դարանաղի գավառի Անի ամրոց-քաղաքը Եփրատի ափին Anniaca անվան տակ¹⁵, որը գուցե կապ ունի հայասական Աննիա թագավորի անվան հետ: Երզնկայի գաղտի խոշոր կենտրոններից էր Բիթառիզա քաղաքը (ներկ. Բիթառիճ, Ալթին-թեփեի ավերակներից ոչ հեռու), որ այլ կերպ կոչվել է Պաթթեյառիկա: Այս անունը երբեմն վերագրվում էր ողջ Հայասա-Աղզի երկրին: Հայասայի քաղաքների թվին էր պատկանում նաև Աննիա քաղաքը, որը տեղադրվում էր անտիկ Առանեի (ներկա Ալաջա-խան) տեղում:

Այսպիսով, սկզբնաղբյուրներից մեզ հայտնի տվյալների հանրագումարը ցույց է տալիս, որ միանգամայն ճիշտ է Հայասա-Աղզի թագավորության տերիտորիայի տեղորոշումը խեթական արձանագրությունների «Բարձր երկրից» (կամ «Վերին աշխարհից») հյուսիս-արևմուտք, հին հայկական Բարձր Հայք նահանգի¹⁶ սահմաններում, արևմուտքում՝ բուն Փոքր Հայքի տերիտորիայի ընդգրկմամբ: Այդ ընդարձակ ցեղային միության կենտրոնական շրջանները գտնվում էին անտիկ աղբյուրների Ակիլիսենեում, որն ընդգրկում էր հին հայկական Եկեղյաց, Դարանաղի-Աղիվ և Մուզուր գավառները: Խեթերի և հայասացիների միջև ընդհարումները տեղի էին ունենում գերազանցապես Փոքր Հայքի հողերի հյուսիսում և հյուսիս-արևմուտքում ընկած տերիտորիաներում, Հալիս և Գայլ գետ (Լիկոս) գետի ակունքների շրջանում: Զգալիորեն ավելի ուշ, երբ Հայասա-Աղզին կազմող երկրների միությունը արդեն գոյություն չուներ, Հեկատայոս Միլետացին (մ. թ. ա. VI դ.), այնուհետև Դիոդորոս Սիկիլիացին (մ. թ. ա. շուրջ 90—21 թթ.) վկայում են. մեկը՝ արմենական լեռան (Ἀρμένιον ὄρος), որտեղից բխում է Հալիս գետը և մյուսը՝ խոյերի ցեղի գոյության մասին հետագայում Տայք անունով հայտնի նահանգի տերիտորիայում: Այս խոյ ցեղանվան հիմքում թերևս նշմարվում է նույն «Հայասա» անունը՝ առանց լուսիա-խեթական «-սա» վերջավորության:

¹³ Պետք է ճիշտ լինի Գ. Ղափանցյանի առաջարկած տեղադրումը Երզնկայի դաշտում՝ Ալթին-թեփեի ավերակների վայրում, ավելի ուշ շրջանի Զիմին-Մումինա կենտրոնից 4 կմ հարավ: Տե՛ս Գր. Կապանցյան, նշվ. աշխ., էջ 63:

¹⁴ E. Forrer, նշվ. աշխ., էջ 1—2: Գր. Կապանցյան, նշվ. աշխ., էջ 18—19:

¹⁵ Մի ուրիշ Anniaca քաղաք էլ գոյություն է ունեցել Թերմոզոնտ-Գայլ գետի (ներկ. Կել-կիտ-չայ) ափին, անտիկ Կողոնիայի տեղում (ներկ. Կոյուլ-Հիսար):

¹⁶ Կարելի է ենթադրել, որ «Բարձր Հայք» անունը առաջացել է խեթական «Բարձր երկիր»՝ «Վերին աշխարհ» անվան նմանությամբ:

Hajasa անվանումը «բացահայտորեն համահնչուն է հայերի աղղային անվան հետ, որոնք իրենց կոչում են եզակի՝ «հայ», հոգնակի՝ «հայք», իսկ իրենց երկիրը՝ «Հայք» («հայ» անվան հոգնակի թվից, որ փոխանցվել է հայերի զբաղեցրած տերիտորիային) կամ «Հայաստան»²⁰։

Անդրազառնալով Հայասա երկրի տեղադրության խնդրին, անհրաժեշտ է ավելի առաջ ունենալ Հ. Մանանդյանի այն պնդումը, որ «Ուռա, Ինգալավա, Առիպսա, Դուկամա քաղաքների տեղադրման հետ է կապված Հայասա-Ազգի թագավորության տեղորոշման հարցի լուծումը»²¹։ Սակայն այդ երկրի և նրա քնակավայրերի Հ. Մանանդյանի առաջարկած նոր տեղադրությունը լուրջ քննադատության չի դիմանում և ի վիճակի չէ սասանելու Հայասա-Ազգի տեղադրության մասին Ֆոոների հայտնած կարծիքը, որը հաստատորեն տեղ է բռնել արևելագետների աշխատություններում։

Ն. Գ. Ադոնցի ուղադրությունը գրավել էր այն ընդհանրությունը, որ գոյություն ունի Հայասա-Ազգի երկրի և Արևմտյան ու Արևելյան Տիգրիսի ավազանում ընկած շրջանների ցեղանունների, տեղանունների և անձնանունների միջև։ Նա մասնավորապես գտնում է, որ եթե Alzi-ն նույն Azzı-ն չէ, ապա համենայն դեպս նա Purulumzi-ի հետ միասին պատկանում է նույն Azzı ժողովրդին²²։ Alzi||Alše շրջանը նույնական է ասորեստանյան Enzitu||Anzitu-ին և հին հայկական Անձիտին (Anzitenae)՝ հարևան գավառների ընդգրկմամբ։

Ավելի ուշ այս անունը Alzini ձևով տարածվում է ասորեստանյան սեպագրերում հիշատակվող Շուպրիա երկրի ողջ տերիտորիայի վրա և համապատասխանում է հին հայկական Աղձնիք նահանգին։ Վերջինից դեպի արևելք, Արևելյան Տիգրիսի ակունքների շրջանում գտնվում էր հին հայկական Անձավաղիք գավառը, որի անունը ծագում է նույն Alzi||Anzi||Anzawa||Arcawa-ից։ Հետաքրքրական է, որ միջին դարերում այդ գավառը կոչվում էր նաև Աղզի²³։

Alše ցեղային միության սահմաններն այդ շրջանում հավանորեն հասնում էին մինչև Քաշշիարի լեռները (Մասիուս-Տուռ-Աբդին)։ Միտանիի անկումից հետո նրա հյուսիսային շրջանները մտնում են Ալշե երկրի կազմի մեջ։ Այս նույն ձևով ընդարձակվում է Իշուվա երկիրը։ Խեթական Թուֆխալիաս IV թագավորը (1250—1220) իր երկրին է միացնում Ugasta շրջանը, որը, հավանորեն, կոչվել է նաև Զուխմե||Սուխմե, տեղադրվում է Արածանիի վտակ Գայլ (այժմ՝ Մուզուր-սու) և Մեւս Գայլ (այժմ՝ Քըղի-սու) գետերի ավազանում։ Արածանիի հյուսիսային ափին, այն գետանցի մոտ, որտեղ ուշ շրջանում գտնվում էր Արշամաշատ քաղաքը (ներկ. Խարաբա-Նաջարան ավերակները այդ գետի հարավային ափին), պետք է գտնվելիս լինեն խեթական աղբյուր-

²⁰ Г. Б. Джаукян, *ևլ.* աշխ., էջ 10։

²¹ Я. А. Манандян, О некоторых спорных проблемах истории и географии древней Армении, Ереван, 1956, էջ 100։

²² Ն. Ադոնց, *ևլ.* աշխ., էջ 50։

²³ Ներկայումս հին Անձավաղիքի տերիտորիայում պահպանվել է մի դյուղ Աղսու իմաստավորված անվամբ։ Աղզի դյուղը հիշատակվում է Անձևացիք գավառում՝ հայ պատմիչ Թովմաս Արծրունու մոտ։ Տե՛ս «Թովմայ վարդապետի Արծրունույ Պատմութիւն տանն Արծրունեաց», ՄՊՔ, 1887, Գ, ԻԹ, էջ 143, 260։ Մեր կարծիքով պատահական չէ, որ բերվող ղուդահնոները գիտվում են այն տերիտորիաներում, որոնք ամենից շատ են ներգրավվել հայացման ընդհանուր պրոցեսի մեջ։

ների Ուղաշտա քաղաքը, ուրարտական արձանագրությունների Ուաշտալը²⁴։ Որոշ ուսումնասիրողներ «սոմեխի» էթնիկական տերմինը, որ վրացերեն նշանակում է «հայ», արտաբերում են Զուխմե||Սուխմե հրկրի անունից, բայց դա բնականորեն բացատրություն է և այլ տվյալներով չի հաստատվում²⁵։

Հայասա-Աղզի, Իշուլա, Ալշե||Ալզի և Զուխմե||Սուխմե երկրների տեղորոշումը միանգամայն համահունչն է Շուպուիլուիումա թագավորի (1380—1346) «Տարեգրությունների» տվյալներին, որոնք հաղորդում են, թե Հայասան սահմանակից էր Զուխմե, Իշուլա և Ալշե երկրներին։

Հայասա-Աղզի երկրների միության տրոհումից հետո (1200—1130), երբ հյուսիսից ու հյուսիս-արևմուտքից ակտիվանում է կասկեական-աբեշլական ցեղերի, իսկ այնուհետև (մ. թ. ա. VIII դարից)՝ Եփրատ գետի վերին հոսանքի շրջանը զբաղեցրած քարթլեական ցեղերի շարժումը դեպի հարավ, Հայասական ցեղերի մի մասը անջատվում է իր համացեղայիններից։ Հայասացիների հետ կապ պետք է ունենա Դիոդորոս Սիկիլիացու հիշատակած (XIV. 29) Χασα և Ստեփաննոս Բյուզանդացու Χασ անունները կրող ցեղը, որը բնակվելիս է եղել փասիանների²⁶ կողքին կամ բեխիրներին հարևան Պարխարյան լեռներում²⁷։ Հավանաբար, պատահական չէ, որ խոյերի փոխարեն Քսենոփոնը իր «Անաբազիս»-ում (IV, 6, 5) հիշատակում է տառիսներին, այսինքն՝ հին հայկական Տայք նահանգի բնակիչներին։ Ամենայն հավանականությամբ Դադյու և Χασ էթնոնիմները գտնվում են նույն փոխհարաբերության մեջ, ինչ նրանց հայերեն Տայք և Հայք (սեռ. հոգ. հոլ.՝ Տայոց-Հայոց, բարբառային՝ Տաուոց-Հաուոց)²⁸ համարժեքները։ Ասվածը հիմք է տալիս ենթադրելու, որ ասսուրա-բաբելական Դայանի և ուրարտական աղբյուրներում Դիաուեխի²⁹ ձևով հիշատակվող ցեղային միությունը, որ գոյություն է ունեցել մ. թ. ա. XI—IX դարերում, Հայասա-Աղզի ցեղային միության ժառանգորդն է։

Χασ էթնիկական տերմինը մյուս անտիկ աղբյուրներում հանդես է գալիս Խալաթ, Χασդու և Դադյու ձևերով։ Հատուկ հետաքրքրություն է ներկայացնում վերջին՝ Դադյու տերմինը։ Այդ ցեղը անտիկ աղբյուրներում վկայված է Սև ծովի հարավային և հյուսիս-արևելյան ափերին, գերիշխող աբխազա-ադըղեական էթնիկական աշխարհի շրջապատում։ Այդ «աբաջացիները» հել-

²⁴ Սամանասար III-ի (859—824) Տուշխանից գտնված մոնոլիթի վրայի արձանագրության մեջ կարդում ենք. «Ես դուրս եկա էնդիտից, անցա Արծանիա գետը և մոտեցա Սուխմա երկրին, զբաղեցի Ուաշտալը, նրա ամրացված քաղաքը...»։ АВММУ, № 27 (II, 45), ВДМ 1951, № 2, էջ 296։

²⁵ Г. А. Халатянц, О некоторых географических названиях древней Армении в связи с данными ванских надписей, «Древности Восточные. Труды Восточной Комиссии Имп. Археол. Об-ва», том II, вып. II, 1901, էջ 126։

²⁶ Այս ցեղային անունը պահպանվել է հին հայկական Բասեան || Բասեն գավառի անվան մեջ։

²⁷ Հետադոտողներից ոմանք համարում են, որ այս ցեղանունները զրչագրական սխալի հետևանք են և պիտի Դադյու անվան երկրորդ մասնիկը լինեն։ Տե՛ս «Вестник древней истории», 1947, № 4, էջ 260, ծան. 2 և Я. А. Манандян, О некоторых спорных проблемах..., էջ 75։

²⁸ Վերջիններից պետք է ծագած լինի Տայքին (տառիսների երկրին) և Բասենին (փասիան-ների երկրին) հարևան Հավնունիք նախարարական տան գավառի անունը։

²⁹ Պետք է հաշվի առնել, որ ուրարտական սեպագրերում 0-ի համար առանձին նշան չկար, և նա հաղորդվում էր Ա-ի միջոցով։

լենիստական-հոմեական դարաշրջանում հանդիպում են Պոնտոսում և ներկայիս Սոչիի շրջանում: Ապրելով աբխազա-ադրդեական ցեղերի մեջ, նրանք հետագայում պետք է ձուլվեն լեռնաշխարհի: Խոյերի այն մասը, որ մնացել էր Ճորոխի հովտում, ներգրավվել է հայերի համախմբման ընդհանուր պրոցեսի մեջ, դառնալով ձևավորվող հայ ժողովրդի հիմնական բաղադրիչներից մեկը:

Հաճախ Կիզիլատնա երկրների խմբավորման կազմումն էին լինում Թեգարամմա և Մալդիա խուրրիական երկրները, որոնք գտնվում էին Կանեշ-Աշշուր հնագույն քարավանային ճանապարհի մեծ մայրուղու վրա:

Մ. թ. ա. III հազարամյակը վաղ բրոնզի արդյունագործության ծաղկման շրջանն էր և Հարավային Միջագետքի արգավանդ, ողողվող մարգագետիններում առաջացած քաղաք-պետությունները առևտրական կապեր հաստատեցին Իրանական բարձրավանդակի արևմտյան ծայրամասի, Հայկական լեռնաշխարհի հարավային ծայրամասի և Փոքր Ասիայի հարավ-արևելյան մասի (որոնք հայանի էին պղնձի, արծիճի, անագի և արծաթի հանքերով) ցեղապետների հետ: Մ. թ. ա. III—II հազարամյակների սահմանագլխին արդեն Աշշուր քաղաքի ակկադացի վաճառականները, որոնք միջնորդ առևտուր էին վարում Շումերի և խեթերի միջև, հիմնում են իրենց առևտրական գաղութ-ֆակտորիաները: սրանք առևտրական սերտ կապեր են հաստատում շրջակայքի ցեղերի ու ժողովուրդների և առաջին հերթին՝ Հայկական լեռնաշխարհի հարավ-արևմտյան շրջանների ու Փոքր Ասիայի արևելյան մասի բնակիչների հետ: Միջադպրային այս փոխանակության մեջ կապող օղակների դեր էին խաղում քաղաքային համայնքները (որոնք շուտով դառնում են քաղաք-պետություններ)՝ Կանեշը, Արմատանա-Արմասը (հավանորեն ներկայիս Պալաս գյուղի շրջակայքը, Կեսարիայից հյուսիս-արևելք)³⁰, Կումմանուն (անտիկ դարաշրջանի Ոսկե Կոմանան), Թեգարամման (ներկայիս Գյուրյունը, անտիկ դարաշրջանի Գաուրենեն), Մալդիան (ներկ. Մալաթիան, անտիկ դարաշրջանի Մելիտինեն), որ աճել էր Եփրատի գետանցից ոչ հեռու, Ամեդուն կամ Մագանին (ներկ. Դիարբեքիրը, անտիկ դարաշրջանի Ամիդան) Տիգրիսի վրա, Վաշշուգանեն կամ Աշշուկանեն (ներկ. Թել-Բաշ), Կալխու-Լարիսան (ներկ. Նեմրուդը, ասսուրա-բաբելական աղբյուրների Կալախը) և Աշշուրը (ներկ. Շարգատը), որը Տիգրիսի վրայով կապ էր պահպանում Ակկադի և Շումերի քաղաքների հետ: Շուտով առևտրական այս մայրուղին գրավում են խուրրի-միտանացիները, որոնց ստեղծած հզոր տերությունն իր գոյությունը պահպանեց մ. թ. ա. XVII—XV դարերում: Միտանիի հզորությունը խորտակեցին խեթերը:

Փոքր Ասիայի արևելյան մասի քաղաք-պետությունները, որ հիմնվել էին առևտրական այս մայրուղու վրա, ծագումնաբանորեն կապված էին Հայաստ-Աղվի ցեղային միության հետ և Կիզիլատնայի երկրների խմբավորման հետ միասին խեթական տերության կազմի մեջ էին գտնվում: Նրանց մեջ առաջինը Թեգարամմա քաղաք-պետությունն էր: Խեթական արձանագրությունների Թեգարամմա քաղաքը, որը համասլատասխանում է ասսուրա-բաբելական

³⁰ Խեթական արձանագրությունների Armatana երկիրը կապվում է լուսնի աստված Armasa-ի հետ, որին նվիրված սրբավայրը պետք է տեղադրել Պատինգերյան քարտեզի Armaza կայարանի տեղում (այժմյան Պալաս գյուղի մոտերքը): Պողոմեոսը (V, 6, 14) հիշատակում է այս վայրը "Αρχαα, "Αρχαλλα, "Αρχαλα աղճատված ձևերով:

աղբյուրների Թիլ-Գարիմմուին (անտիկ աղբյուրների Gaurenae, ներկ. Գյուրյուն), այդ պետության մայրաքաղաքն էր: Թեզարամմա երկիրը նույնացվում է բիրլիական Թոդարմայի հետ, Աստվածաշնչի հայերեն թարգմանության մեջ՝ «Տուն Թորգոմայ» (Գիրք Մենդոց, X, 3: Գիրք Մնացորդաց, Ա, I, 5—6: Եղեկիեզ, XXVII, 13, XXXVIII, 6): Հայ պատմական ավանդության մեջ «Թորգոմայ տունը» համարվում է Հայաստանի հոմանիշը, իսկ հայերը անվանվում են «Թորգոմեան», «Թորգոմածին»:

Արևելքում Թեզարամման իր մեջ էր առնում Պախսուվա «երկիրը» (ներկ. Արաբկիր քաղաքի շրջանը) և հավանաբար Թեբուրդիա կամ Թեբուրդի (ըստ խեթական և ասորեստանյան աղբյուրների) «երկիրը»: Այն տեղորոշվում է Եփրատի աջ ափին, այժմ Յաղջի-չայ կոչվող վտակի հովտում: Պախսուվայի և Թեբուրդիայի միջոցով Թեզարամման Եփրատով սահմանակից էր Իշուվային, որը գտնվում էր հետագա Մոփքի տերիտորիայում: Իշուվայի և Միտանիի վրա արշավելիս խեթերը անցնում էին Թեզարամմայի և Մելիդուի վրայով: Վերջինիս մոտ էր գտնվում Եփրատի գլխավոր գետանցը: Հաճախ նույն Թեզարամմայի վրայով խեթերը ներխուժում էին Հայասա-Աղզի երկրների համադաշնակցության թիկունքը: Կանեշ-Աշշուր առևտրական մեծ մայրուղու վրա գտնվող մյուս քաղաք-պետությունը Մելիդուն էր կամ Մալդիան: Նրա մայրաքաղաքը՝ Մալդիան (Մելիդա, Մելիտա, անտիկ Melitene, ներկ. էսկի-Մալաթիա), գտնվում էր Եփրատի գլխավոր գետանցի Ուրշա կամ Ուրուսա (Պետինգերյան քարտեզի adAras, ներկ. Փորուտ դյուղից ոչ հեռու) քաղաքի մոտ, Եփրատի գիմացի ափին գտնվում էր գետանցի մյուս ծայրը՝ Տումեիշկի քաղաքը, որը հետագայում հայտնի էր ուրարտական աղբյուրներից (ներկ. Իզուլու գյուղը, անտիկ դարաշրջանի Տումիսան): Երրորդ քաղաք-պետությունը՝ Կումմուխը կամ Կումմախան (անտիկ դարաշրջանի Commagene) առաջացավ Մալդիայից հարավ, Եփրատի աջ ափին: Նրա մայրաքաղաքը՝ Կումմախան (անտիկ դարաշրջանի Սամոսատր, ներկ. Սումեյսատ), գտնվում էր Եփրատի այն գետանցի մոտ, որի նշանակությունը հատկապես մեծացավ հետագայում:

* * *

Հայասա-Աղզիի մասին տեղեկությունները վերանում են խեթական պետության վերացումից հետո, որ տեղի ունեցավ մ. թ. ա. 1200—1190 թթ. և հետևանք էր հնդեվրոպական նոր ցեղերի տեղաշարժերի՝ արևմուտքից դեպի արևելք: Այդ գերազանցապես թրակա-փոյուղական ցեղերի տեղաշարժն էր: Սրանք էին, որ հիմնական գործոն դարձան հայ ժողովրդի ձևավորման արագացման ընթացքում:

Մ. թ. ա. II հազարամյակի երկրորդ կեսին մեծ թափ է ստանում ցեղերի տեղաշարժը էդեյան աշխարհից և Բալկաններից դեպի Փոքր Ասիա, Լևանտի ծովեղերը և նույնիսկ Նեղոսի դելտա՝ Եգիպտոս: Եգիպտական աղբյուրներում բոլոր այս հարձակվող ցեղերը կոչվում են «ծովի ժողովուրդներ»:

«Ծովի մարդկանց» թվում հանդես են գալիս նաև բաղմաթիվ թրակա-փոյուղական ցեղեր, որոնք Փոքր Ասիա էին թափանցում Բալկանյան թերակղզու հյուսիսային մասերից՝ մերձդանուբյան շրջաններից ու թերևս մասամբ՝ Հյուսիսային Կովկասի և Անդրկովկասի կողմից:

Թրակա-փոյուղական ցեղերի այս տեղաշարժը կատարվել է մի շարք ալիքներով, որոնք ժամանակագրական տևակետից կարելի է բաժանել եր-

կու խմբի՝ նախքան Տրոյական պատերազմը (մ. թ. ա. XII դարի վերջ) և դրանից հետո:

Փոքր Ասիա տեղափոխված թրակա-փոյուզական ցեղերի մեջ առաջիններից էին արիմները (ἄριμοι) նախահայերենի կրողները, որոնք թղբյուրների կցկտուր տեղեկությունների համաձայն, տեղավորվել են Փոքր Ասիայի կենտրոնական և հարավ-արևմտյան մասերի մի շարք վայրերում:

Ըստ «Իլիականի» (II, 783), նրանք ապրելիս են եղել Արգեոս լեռան և Մաժաբ (Կեսարիա) քաղաքի շրջակայքում: Հայերի նախնիներին այս տերիտորիայում հիշում է նաև հայ ազգային ավանդությունը:

Լեզվի և պատմական գրականության տվյալները ևս ցույց են տալիս, որ հայերի հնդեվրոպական նախնիների մի ճյուղը երկարատև շփման մեջ է եղել փոքրասիական և էգեյան ցեղերի ու ժողովուրդների ու հատկապես տրոյացիների հետ³¹:

Թրակական ծովեզերքից Փոքր Ասիա տեղափոխվելիս փոյուզական ցեղերը նախ և առաջ պետք է ընդհարվելին այն ժամանակ դեռ հզոր Տրոյական տերության հետ, որը Միքենեի և իեթական թագավորության մրցակիցն էր: Մ. թ. ա. II հազարամյակի կեսերին այդ ցեղերը, Մարմարա ծովի փոքրասիական ափը տեղափոխվելով, հայտնվում են Տրոյական պետության սահմաններում, և նոր տեղում նախահայերենը սերտ շփման մեջ է մտնում տրոյա-էտրուսկյան³² և իեթա-լուվիական լեզուների հետ:

Փոյուզական ցեղերի մի այլ ալիք Պրոպոնտիսի (Մարմարա ծովի) թրակական ափից ասիական ափ է անցել այսպես կոչված դորիական գաղթի ժամանակաշրջանում, այսինքն՝ մոտավորապես XII դարի սկզբին: Ստրաբոնը (XIII, 1, 8) հաղորդում է, որ լիկիացիներից, կիլիկացիներից և այլ ցեղերից ավելի ուշ Տրոադայում հայտնվում են փոյուզացիները, թրակացիները և տրերները:

Տրոյան, ըստ հունական պատմական ավանդության, եղել է Միքենեի դիսավոր մրցակիցը Փոքր Ասիայում: Նա հսկում էր մուտքը դեպի Հելեսպոնտոսի նեղուցն ու Սև ծովը և առևտրական կապեր էր պահպանում ողջ արևելյան միջերկրածովյան ավազանի երկրների հետ և, հատկապես, աքայան (միքենյան) Հունաստանի հետ: Տրոյան պետք է մշակութային և քաղաքական կապեր ունեցած լինի նաև իեթական թագավորության հետ: Այդ հզոր պետությունը չլիմացավ թրակա-փոյուզական ցեղերի ձնշմանը: Հնագիտորեն հաս-

31 Հերոդոտի ուսերեն թարգմանության ծանոթագրություններում Ֆ. Գ. Միլլենկոն փոյուզացիների առիթով գրում է. «Փոքրասիական թերակղզում փոյուզացիների բնակավայրերի խոր հնությունը, ինչպես նաև նրանց ազգակցությունը մի կողմից արմենների և մյուս կողմից՝ հելլենների հետ, ամեն կասկածից վեր է. այս ժողովուրդների միջև եղած միջանկյալ օղակները պետք է համարել միսիացիներին, մեոններին, միգդոններին, գոլթոններին, տրոյացիներին»: Геродот, История в девяти книгах. Перевод с греческого Ф. Г. Мищенко, т. II, М., 1888, էջ 607:

32 Վ. Ի. Գեորգիևի պրպոնտները բերում են այն եզրակացության, որ «էտրուսկերենի հնչյունական կառուցվածքը շատ նման է հայերենի կառուցվածքին», իսկ էտրուսկերեն որոշ բառեր իրենց ճշգրիտ համապատասխանությունն ունեն հայոց լեզվում»: Նույն հեղինակը ենթադրում է, որ «հայերի նախնիները բնակվել են տրոյացիների մոտերքը ինչ-որ տեղ»։ Հունական պատմական ավանդությունը հաստատում է Վ. Ի. Գեորգիևի այս եզրակացությունը (В. И. Георгиев, նշվ. աշխ., էջ 194):

տատված է, որ Տրոյան մ. թ. ա. XII դարում կործանվել է հրդեհից, դա համապատասխանում է հոմերոսյան էպոսի տվյալներին, ըստ որոնց միքենյան հուլները գրավում են Տրոյա-Իլիոնը և հրկիչում: Տրոյա VII-ա-ի ավերակների վրա ստեղծվում է Տրոյա VII-բ բնակավայրը՝ միանգամայն այլ բնակչության: Հատկապես անհրաժեշտ է նշել, որ այստեղ երևան է գալիս կենտրոնական-եվրոպական և մերձդանուբյան ծագում ունեցող այսպես կոչված «ելունդային խեցեղենը» (Buckelkeramik)³³: Ըստ երևույթին, Տրոյայի կործանումից հետո Տրոադայի տերիտորիայում հաստատվել են փոյուզացիները և այնուհետև անտիկ դարաշրջանում այդ երկրամասը կոչվում է Հելլեսպոնտական կամ Փոքր Փոյուզիա:

Ենթադրվում է, որ խեթական թագավորությունը ևս կործանվել է փոյուզացիների հարվածներից, որոնք գրավեցին նրա ողջ տերիտորիան: Այն տրոհվեց մանր պետական կազմավորումների: Պետք է հաշվի առնել, որ խեթական թագավորությունը հարկադրված էր պայքարել նաև արևելքում՝ Պոնտոսի և Անտիտալրոսի անտառապատ ձորերում բնակվող նախախեթական ցեղերի դեմ: Այսպես, խեթական Թուֆխալիաս IV թագավորի (շուրջ 1250—1220 թթ.) տարեգրություններում կարդում ենք, որ Ասսուլայի դեմ նրա ձեռնարկած արշավանքի ժամանակ արևելքից կրկին սկսել են հարձակումներ գործել կասկերը: Այդ ժամանակ է (XII դարի սկզբին), որ քայքայվում է Հայասա-Աղզի ցեղային միությունը, ապա ընկնում է նաև խեթական պետությունը: Փոյուզական ցեղերը հաստատվել էին Սանգարիա գետի հովտում և այնտեղից շարժվում էին դեպի Հալիս գետի հովիտն ու Անտիտալրոսի շրջանը: Հալիս գետի հովտում փոյուզական այս ցեղերը պիտի հանդիպեին իրենցից առաջ այդտեղ հաստատված իրենց ցեղակից արիմներին (ուրումեացիներին), որոնց հետ միասին, ինչպես նաև տեղաբնիկ նախախեթական այլ ցեղերի հետ անցան Եփրատը և ներխուժեցին (մ. թ. ա. 1165 թ.) Ասորեստանի տիրապետության տակ գտնվող Շուպրիա երկիրը՝ Արևմտյան Տիգրիսի հովտում:

Ասորեստանի սահմանները ներխուժող այդ ցեղերը ասսուրա-բաբելական արձանագրություններում կոչվում են mušku, muškaya և, ըստ երևույթին, իրավացի են այն ուսումնասիրողները, որոնց կարծիքով մուշկերը միդիացիներն են (Μύδοι), որոնց անունով էլ Տրոյա քաղաք-պետության երկրամասը կոչվեց Միդիա (Μυδα): Թրակա-փոյուզական ցեղերից, արիմ-արմեններից հետո, հավանաբար, միսիացիներն էին, որ զաղթեցին Փոքր Ասիայի կենտրոնական շրջանները, և նրանց անունով էլ ասորեստանցիները և Առաջավոր Ասիայի մյուս ժողովուրդները թրակա-փոյուզական լեզվալուդի բոլոր հնդեվրոպական ցեղերին անվանում էին մուշկեր³⁴: Ինչպես այժմ պարզվում է, «մուշկերի» տակ հասկացվում էին ոչ միայն փոյուզացիները, այլև նախահայերենով խոսող ցեղերը (արիմները, ուրումեացիները):

Թրակա-փոյուզական ցեղերի անցած ողջ ճանապարհն ուղենշված է փոյուզական տիպի դամբարանաբլուրներով: Դրանց յուրօրինակ նյութական մշակույթը նույնական է Տրոյայի, Աքսիոս գետի հարթավայրի կամ Սալոնիկի

³³ И. М. Дьяконов, Предыстория армянского народа, էջ 117:

³⁴ Ի. Մ. Դյակոնով, խեթերը, փոյուզացիները և հայերը, ՀՍՍՀ ԳԱ «Տեղեկագիր» (հաս. գիտ.), Երևան, 1956, № 11, էջ 71:

հարթավայրի մշակույթի հետ³⁵։ Այստեղից այդ դամբարանաբլուրները ձրգվում են դեպի փոքրասիական ծովեզերքը՝ Տրոադա և շարունակվում, ինչպես ցույց է տվել Ն. Ադոնցը³⁶, Մալաթիա—Խարբերդ—Դիարբեքիր—Սասուն գծով, Աքսիոս գետի հարթավայրից մինչև Բող-հյուսիս։ այդ դամբարանաբլուրների համար բնորոշ է մասնավորապես ἄσπετος ἀντοχή. և schnabelkanne տեսակների խեցեղենը։ Այս երկուսն էլ հատուկ են Տրոյայի խեցեղենին³⁷։

Հոմերոսյան էպոսի ստեղծման շրջանում (մ. թ. ա. X—XI դդ.) նախահայկական ցեղերից մեկը՝ արիմների ցեղը³⁸, հայտնի էր հույներին մի շարք վայրերում՝ Աքսիոս գետի հովտում, Միսիայում՝ միսիացիների և փոյուզացիների կողքին՝ Կատակեկավմեն շրջանում, Հիդա գետի հովտում, Եփեսոս քաղաքի շրջակայքում³⁹, Կիլիկիայում՝ Կալյուկադնոս գետի հովտում, ուր գտնվում են «Արիմների լեռները», Օրոնտեսի գետաբերանի մոտ՝ Անտիոքի շրջանում և, վերջապես, Կապադովկիայի Արգեոս լեռան շրջակայքում, որտեղ տեղադրվում է հայ ազգային ավանդույթյան «Պոտին Արմենիան»՝ «Առաջին Հայքը»։ Բոլոր այդ վայրերի հետ է կապվում նաև հրաշունչ լեռան և Տյուփոն հրեշի առասպելը։ Այս առասպելը, որ զոյուբյուն ուներ և՛ Միսիայի, և՛ Լյուդիայի սահմանի մոտ, և՛ Կիլիկիայում, և՛ Օրոնտեսի գետաբերանի շրջանում, և՛ Արգեոս լեռան շրջակայքում, կապվում է, ուրեմն, արիմների ցեղերի հետ։

Հրաշունչ լեռան (որի տակ, ըստ առասպելի, թաղվել է հրեշ Տյուփոնի դիակը՝ Զևսից պարտվելուց հետո) տեղորոշումն Արգեոս լեռան շրջանում գերմանացի գիտնական Մարկվարտին թույլ է տվել ենթադրելու, որ ի դեմս Ἀργεος ցեղի հնագույն հիշատակությունն ունենք արմենների մասին։ Ի հաստատումն իր ենթադրության նա վկայակոչում է այն փաստը, որ հայկական առասպելներում պահպանվել է Զևսի և Տյուփոնի առասպելի տարբերակը. դա արմենների ցեղապետ Արամի և Պայապիս Քաաղեայի կուլի մասին զրույցն է, որ մեջ է բերում Մովսես Խորենացին (Ա, ԺԴ)։ Պատահական չէ, որ հայկական առասպելի համաձայն Արամի և Պայապիս Քաաղեայի կուլիվր տեղի է ունեցել հենց այդ նույն վայրում՝ Մաժակ-Կնսարիայի շրջանում, հրաշունչ Արգեոս լեռան ստորոտում։

³⁵ Տե՛ս D. F i m m e n, Die Kretisch-mykenische Kultur, Leipzig, 1929, էջ 103։

³⁶ Տե՛ս Zeitschrift für Ethnologie, 1901, էջ 181։

³⁷ В л а д Б э н э ц я н у, Некоторые вопросы этногенеза армян, «Պատմա-բանասիրական հանդես», Երևան, 1961, № 2, էջ 103։

³⁸ Հելլենիստական դարաշրջանում Ἀργεος էթնիկական անունը վաղուց արդեն փոխարինվել էր ավելի զարգացած Ἀργενσιος անունով, այդ պատճառով էլ գրականության մեջ հանդիպող Ἀργεος-ն սովորաբար նույնացնում էին Ἀργενσιος-ի հետ, որը նշանակում էր արամեացիներ։ Առաջին այդպիսի սխալը կատարել է Ստրաբոնը՝ նա արիմներին (XII, 3, 28) մատնացույց է անում ծովեզրյա Կիլիկիայում՝ Կալիկադնոս գետի մոտ, Ասորիքում, Օրոնտեսի գետաբերանի մոտ և Միդիայում (XIII, 4, 6), բայց սխալմամբ նրանց նույնացնում է արամեացիների հետ (XVI, 4, 27), ըստ երևույթին, այդ անվանումների համանշխունությունից ելնելով։ Սակայն աղբյուրներից հայտնի է, որ առաջին անգամ արամեացիները հիշատակվում են Հյուսիսային Միջագետքում, մոտավորապես 1130 թ. «ախլամու» անվան տակ, մինչդեռ հոմերոսյան արիմները հիշատակվում են Տրոյական պատերազմի ժամանակներում, որ ընկնում է մ. թ. ա. XIII դարի վերջին (В. Б э н э ц я н у, նշվ. աշխ., էջ 117)։

³⁹ Ըստ Հեսիոդոսի Եփեսոսը հնում կոչվել է Ἀργεντι

Ձևսին փոխարինող Արամը, ըստ Մարկվարտի, անձնավորում է արիմ-ներին՝ հայերի նախնիներին⁴⁰, Հ. Մանանդյանը ևս նկատում է, որ Խորենացուց բաղված այս հատվածում «կարող են, իրավաս... պահպանված լինել հայ ժողովրդի ազոտ հիշողություններն իր ամենահին անցյալի մասին»⁴¹։

Մովսես Խորենացու շարադրանքի համաձայն, Արամը թշնամու փախուստից հետո այդ վայրի («ի տեղի մի, որ այժմ ասի Կեսարիա») կառավարիչ է նշանակում իր ազգականներից մեկին, Մշակ անունով⁴²։ Այս Մշակ անվան մեջ էլ պահպանվել է փոյուզ-միսիացիների մուշկ էթնոնիմը՝ հին հայկական Մուշակ ձևով և համահնչուն է մ. թ. ա. XII—IX դդ. հիերոգլիֆիկ-խեթական արձանագրություններում պատահող Musaka ցեղանվան։ Ըստ այսմ պատահական չպետք է համարել, որ այս տերիտորիան համապատասխանում է անտիկ ժամանակաշրջանի Կապադովկիայի վարչական միավորներից մեկին՝ ստրատեգիա Կիլիկիային իր Մաժակ մայրաքաղաքով։ Կարևոր է նշել, որ հայերի ծագման մասին հին պատմական գրույցները, որ հավաքել է Մովսես Խորենացին V դարում, այս երկրամասը կոչում են «Պոտին Արմենիա» (Πρωτη Ἀρμενία)⁴³։ Թեև Խորենացին ստուգաբանում է այն իբրև «Առաջին Հայք», սակայն իրականում այս անունը ոչ մի առնչություն չունի մ. թ. IV դարից հայտնի «Առաջին Հայք» (Armenia Prima) հռոմեական պրովինցիայի հետ, չնայած որ հարևան էր նրան, այլ նշանակում է «նախնական Հայաստան»։ Խորենացու սխալը կրկնել է և VII դարի մեր «Աշխարհացոյցի» հեղինակը։

Խոսելով առասպելական Արամի այդ երկրում կատարած սխրագործությունների մասին, Մովսես Խորենացին հղում անում է. «Վասն որոյ մինչև ցայսօր ժամանակի անուանեն Յոյնք ղկղիմայն զայն Պոտին Արմենիան, որ թարգմանի Առաջին Հայք։ Եւ զղաստակերտն, զոր շինեաց յանուն իւր Մշակ կողմնապետն Արամայ, փոքրագունիւք պարսպալ որմովք, անուանէին հինք աշխարհին՝ Մաժաք, որպէս ոչ կարելով ուղղախօսել. մինչև յստոյ յոմանց ընդարձակադոյն շինեալ՝ անուանեցաւ Կեսարիա»։ Այնուհետև պատմիչը գրում է. «Արդ սա այսպէս հզօր և տնտանի հղեալ՝ յտնուն սորա մինչև ցայսօր, որպէս ամենեցուն յայտնի է, որ շուրջ զմեօք ազգք զաշխարհս մեր անուանեն»⁴⁴։ Այսինքն՝ այս Արամի անունով անվանում էին՝ «ամենայն ազգք, որպէս Յոյնք՝ Արմէն, իսկ Պարսիկք և Ասորիք՝ Արմէնիկք» (Մովս. Խոր., Ա, ԺԲ)։

Մովսես Խորենացու մոտ պահպանված վկայությունները ցույց են տալիս, որ նրա ժամանակ (մ. թ. V դար) ժողովուրդը հիշողություններ էր պահպանել Փոքր Ասիայում հայերի սկզբնական հայրենիքի մասին, և նրան հայտնի էին այնպիսի ավանդություններ, ըստ որոնց հայերի նախահայրը ոչ թե Հայկն էր, այլ Արամը, որի անունով էլ հարևան ժողովուրդները հայերին կոչում էին արմեններ։

⁴⁰ J. Markwart, Die Entstehung und Wiederherstellung der armenischen Nation. Berlin, 1919, էջ 67. Նույնի՝ Le berceau arménien, «Revue des études arméniennes», 1928, VIII, vol. 2, էջ 221—223.

⁴¹ Հ. Մանանդյան, Քննական տեսություն հայ ժողովրդի պատմության, հատ. II, էջ 23.

⁴² Մ. Խորենացի, Ա, ԺԴ, էջ 45—48.

⁴³ Հայցական հոլով. ուղղականով՝ Πρωτη Ἀρμενία.

⁴⁴ Մովսես Խորենացի, Ա, ԺԴ, էջ 46—47.

Վերջերս ուշադրություն է դարձվել նաև այն փաստի վրա, որ զաղափսրադիր խեթերեն արձանագրությունների տարածման շրջանը «բավական ճշգրիտ համընկնում է Փոքր Հայքի սահմանների հետ, միայն հարավում և հարավ-արևմուտքում անցնելով փոյուզական Տիանիտիսի, Կիլիկիայի և Ասորիքի տերիտորիան»⁴⁵։ Այդ արձանագրությունները պատկանում են մ. թ. ա. I հազարամյակի սկզբին՝ մինչև VIII դարի վերջը կամ նույնիսկ VII դարի սկիզբը։

Այս տերիտորիայում հայալեզու բնակչությունը հաստատվել էր նրանց մասին անտիկ հեղինակների տված առաջին տեղեկություններից (մ. թ. ա. VI դար) շատ ավելի վաղ։ «Սեփական զրավոր և զրական տրադիցիա շունե-նալով, նրանք օգտվում էին այն բնակչության լեզվով ու զրով, որը նրանք ցտել էին այստեղ դեռ XII դարում մ. թ. ա., այն է՝ «հերոգլիֆիկ խեթերի»։ Սրանով էլ հենց պետք է բացատրել «հերոգլիֆիկ խեթերեն» արձանագրությունների տարածման տերիտորիայի մոտավոր համընկնումը հայերի տարածման ենթադրական հնագույն տերիտորիայի հետ⁴⁶։ Սրանով է բացատրվում նաև զաղի խեթական լեզվական շերտի առկայությունը հայերենում»⁴⁷։ Այս գրությունի հիման վրա Ի. Մ. Դյակոնովը հանգում է այն եզրակացության, որ «I հազարամյակի սկզբի հայերը հանդիսանում էին տեղական խեթական (գերազանցապես «հերոգլիֆիկ խեթական») բնակչության և թրակա-փոյուզական «մուշկերի» (բառիս այն առումով, որը հատուկ էր II հազարամյակին մ. թ. ա.) ցեղերի խառնուրդ»⁴⁸։ Բնորոշ է, որ XII—IX դդ. մ. թ. ա. հերոգլիֆիկ-խեթական բնագրերում հիշատակվում է Musaka երկիրը, որը համապատասխանում է հայկական պատմական ավանդության «Մշակ\Մուշակ»-ին, որ պերսոնիֆիկացված ցեղանուն է։

Այստեղ անհրաժեշտ է անդրադառնալ հնդեվրոպական այն ցեղերին, որոնք տարբեր ժամանակներում զաղթել են Փոքր Ասիա և բնակություն հաստատել նախահայկական ցեղերի բնակեցրած տերիտորիայում։ Հին հունական հեղինակների մոտ պահպանված այդ ցեղանունների, տեղանունների և անձնանունների կցկտուր տվյալները մի ինչ-որ չափով լրացնում են մեր ունեցած տեղեկությունները հայ ժողովրդի ծագման մասին։

Դրանցից մեկն է հալիդոնների թրակական ցեղը, որը նախահայերի և խալյուբների հարևանն է եղել Փոքր Հայքում։

Հալիդոնների զաղթը հավանաբար տեղի է ունեցել արիմներից հետո, բայց քանի որ Հոմերոսի «Իլիականում» (II, 857) նրանք հիշատակվում են որպես տրոյացիների դաշնակիցներ, ապա կարող ենք Փոքր Ասիայում նրանց երևալու ժամանակը ևս համարել մ. թ. ա. II հազարամյակի երկրորդ կեսը։ Ըստ երևույթին Փոքր Ասիա զաղթել է հալիդոնների մի մասը միայն, իսկ նրանց հիմնական զանգվածը, դեռևս Հերոդոտի օրոք, շարունակել է ապրել իր վաղեմի տերիտորիայում։ Հալիդոններն ապրում էին ներկայիս Ուկրաինայի տափաստաններում, միլետյան Օլվիա զաղութից հյուսիս, հելլենա-սկյութներից այն կողմ, Բորիսթեն (Դնեպր), Թիրաս (Դնեստր) և Հիպանիս (Բուդ) գետերի միջև։

45 Ի. Մ. Դյակոնով, Խեթերը, փոյուզացիները և հայերը, էջ 73։

46 Այս տերիտորիան համապատասխանում է Թեգարամա, Թոգարմա կամ «Տուն Թորգոմայ» երկրին։

47 Ի. Մ. Դյակոնով, Խեթերը, փոյուզացիները և հայերը, էջ 75։

48 Նույն տեղում, էջ 70։

Դեռևս նախահոմերոսյան շրջանում հալիդոնները շարժվում են դեպի հարավ և մուտք գործում Փոքր Ասիա՝ Բյութանիայի տերիտորիան և նրանից արևելք։ Ավելի ուշ նրանց մնացորդները հանդիպում են Մակեդոնիայում (Պալլենան Քաղկիդիկեում), Փոքր Փոլուզիայում (Տրոյական պետության նախկին տերիտորիան), Կիզիկ քաղաքի մոտերքում (Strabo, XII, 3, 20) և այլուր։ Բայց զաղթածների հիմնական մասը ապրում էր խալկոբների և նախահայերի կողքին Պոնտական և Հայկական լեռներում (Ἀρμενίων ὄρος—ըստ Հեկատայոս Միլետացու), Հալիս գետի ակունքների շրջանում, որն այդպես է կոչվում իրենց անունով։ Սրանք բոլորը ժամանակի ընթացքում ձուլվում են հայերի մեջ։

Հալիդոնների առնչությամբ հետաքրքիր է Հոմերոսի «Իլիականի» այն տեղեկությունը, որ նրանք ելել են տրոյացիների դաշնակիցները և ռազմական օգնություն են ցույց տվել նրանց։ Այս տեղեկությունները պատմական հիմք են տալիս Մովսես Խորենացու (Ա, 16) մոտ պահպանված այն ավանդության, ըստ որի հայերի նահապետ Զարմայրը իր զորքով գնում է Պրիամոսին օգնության և զոհվում Տրոյայի պաշարման ժամանակ։ Համաձայն այդ ավանդության, Զարմայրը տրոյացիներին օգնության է ուղարկվել Ասորեստանի թագավոր Տեվտամի կողմից։ Այս վկայությունը հիշեցնում է հունական այն վերսիսիան, որի համաձայն տրոյացիների դաշնակիցներից մեկն էր Մեմնոնը, Շոշի հիմնադիր Տյուփոնի որդին։ Այս Մեմնոնին Պրիամոսին օգնության էր ուղարկել Տեվտամը, որին անորոշ ձևով անվանում են Ասորեստանի կամ Ասիայի թագավոր։ Տեվտամ անունը ծագում է Տիդդամիս կամ Լիդդամիս հայտնի անունից։ Ուշագրավ է, որ Պրիամոսի դաշնակից պելասգյան առաջնորդները նրան օգնության էին եկել տրոյական կարիսայից և Տևտամի թոռներն էին⁴⁹։ Այլ զրույցներից մեզ հայտնի է, որ Թեսսալական կարիսայում երբեմն տիրել է պելասգյան մի թագավոր Տևտամիդաս (Teutamidas) կամ Տևտամիս (Teutamis) անունով⁵⁰։ Թեսսալական կարիսան ներդաշնակ է Փոքր Հայքի կարիսայի հետ, որը գտնվում էր Հալիսի հովտին հարևան Մելաս գետի ակունքների շրջանում, ասել է՝ հրեշ Տյուփոնի առասպելի հետ կապված վայրերից ոչ հեռու Այստեղ, մոտերքում էր ապրում հալիդոնների ցեղը, ուստի հարց է ծագում՝ արդյոք Զարմայր անունը ուշ շրջանի իմաստավորում չէ՞ («զարմ» + «այր») առաջ եկած Արմայր ձևից, որ տառացիորեն պետք է նշանակի «արիմ այր»։ «Այր» վերջավորությամբ հայերենը պահպանել է «Արամայր» (Արմավիրի հնագույն անունը)⁵¹, «Իշայր» (Մոկաց աշխարհի գավառներից մեկը), իսկ ուրարտական և առուրա-բաբելական արձանագրություններում պահպանվել է Վանա լճից հյուսիս և արևելք գտնվող երկրի անունը՝ Armarili, Armariali, Aramali ձևով։

Այսպիսով, Զարմայրի մասին զրույցը իրական դեպքերի ուշ շրջանի մի աղոտ վերհուշ է՝ արտացոլված Մովսես Խորենացու հաղորդած հայ պատմական ավանդության մեջ։

⁴⁹ Д. Ж. Томсон, Исследования по истории древнегреческого общества. Доисторический Эгейский мир, М., 1958, էջ 259.

⁵⁰ Նույն տեղում։

⁵¹ Այս անվան մի այլ տարբերակն է «Արամայս» անունը։ Արամայր, ըստ ավանդության, հիմնադիրն է «Արամայր» կամ «Արմավիր» քաղաքի։

Հայկական տեղանունների տվյալներից ելնելով, հավանական է *odomantes* թրակական ցեղի գոյությունը Հայաստանում: Մոփքի մոտ *odomantis* անունն է կրել մի ամբողջ շրջան (Ստրաբոն, XI, 14, 5): Օդոմանտները, ըստ Հերոդոտի (V, 16, VII, 112), ապրում էին Մակեդոնիայում, պեոնների կողքին, Օրբելոս լեռան ստորոտի մոտ, Ստրիմոնի դետաբերանի շրջանում: Օդոմանտների մյուս մասն ապրում էր Փոքր Ասիայում, Սինոպի մոտ (Thucydides, 101):

Հայաստանում օդոմանտների բնակության վայրի տեղորոշման համար ուղեցույց կարող են լինել նաև Փոքր Հայքի երկու գավառների անունները՝ Օրբիսեննե և Օրբալիսեննե, որ հիշատակում է Պտղոմեոսը (V, 6): Այս շրջանները տեղադրվում են, ամենայն հավանականությամբ, ներկայիս Դիվրիգի և Արաբկիր բնակավայրերի միջև:

Կարելի է մատնանշել նաև մի շարք նման աշխարհագրական անուններ Փոքր Ասիայում և Հայաստանում (օրինակ՝ Caballa կյուդիայում, Կիլիկիայում և Հայաստանում, Harpasos գետ Կարիայում և Հայաստանում և այլն): Համենայն դեպս տեղանունների և անձնանունների այս զուգորդությունները վկայում են, որ հայերի հնդեվրոպական նախնիները իրոք շարժվել են արևմուտքից արևելք, Փոքր Ասիայի հարավ-արևմտյան կողմից սկսած⁵²:

Հայկական լեռնաշխարհում հալիդոնները, օդոմանտները և մյուս ցեղերը ժամանակի ընթացքում ձուլվել են հայերին:

Խեթական թագավորության կործանումից հետո (մ. թ. ա. 1200—1118) թրակա-փույուգական ցեղերը, որոնց թվում ասսուրա-բաբելական աղբյուրները հիշատակում են փույուգացի-միսիացիներին՝ մուշկեր անվան տակ և արիմուրումեացիներին, շարժվում են արևելք, դեպի Միդիատ և այնտեղից էլ՝ Հայկական լեռնաշխարհ: Այդ շարժման մեջ ներգրավված էին նաև նախախեթական ափսաղա-աղբղեական ցեղերը, որոնք թափանցելով Հայասա-Աղդիի ցեղերի միությունը, անցնում են այդ երկիրը, մասամբ տեղահանում են բնիկներին ու սրանց հետ միանում մուշկերին և ուրումեացիներին: Մ. թ. ա. XII դարի ասորեստանյան արձանագրությունները մեծ տազնապուլ են խոսում մուշկերի ներխուժման մասին՝ ասորեստանյան տերության հյուսիս-արևմտյան շրջանները (մ. թ. ա. շուրջ 1165 թ.): Սրանք հենց այն մուշկերն էին, որոնք ներխուժեցին Հայկական լեռնաշխարհի և Հյուսիսային Միջագետքի սահմանները, դարձան նստակյաց հողագործներ և Ասորեստանի հարկատուներ: Այստեղ ստեղծված թագավորությունը, որի կենտրոնը Խարբերդի դաշտում էր, ասորեստանցիները կոչում են «մուշկերի թագավորություն»⁵³:

Հայկական լեռնաշխարհի սահմանները ներխուժած այդ ցեղերը զբաղեցրել էին Խարբերդի դաշտում և Արևմտյան Տիգրիսի ակունքների շրջանում (հին հայկական Անդեղ տուն գավառը) գտնվող Ալլիի և Պուրուլումդիի շրջանները: Մուշկերն այստեղ ուրումեացիների և կասկեացի-աբեշլացիների հետ միասին կաղմում են ցեղային միություն, որը գլխավորում էին հինգ առաջնորդ «թագավորներ»: Իշուվա և Ալլի Պուրուլումդիի շրջաններում ստեղծված ցեղային այս միությունը՝ «մուշկերի թագավորությունը» բավական հզոր միավորում էր

⁵² Տե՛ս N. Adontz, նշվ. աշխ., էջ 320—327:

⁵³ Մուշկերի այս թագավորությունը չպետք է շփոթել մ. թ. ա. VIII դ. հայտնի մուշկերի թագավորության հետ, որը փույուգական պետություն էր: Տե՛ս Ս. Ն. Երեմյան, Հայերի ցեղային միությունը Արմեն-Շուպրիա երկրում, «Մատմա-բանասիրական հանդես», 1958, № 3, էջ 59—72:

և Ասորեստանի դեմ կարողանում էր հանել 20.000 զորք⁵⁴։ Ասորեստանյան նվաճողների դեմ ընդհանուր պայքարում մուշկերի թագավորության հետ միավորվել էին նաև Արևմտյան Տիգրիսի ավազանի տեղական խուրրիական ցեղերը՝ Շուպրիա, Կադմուխի, Բաբխի, Խաբխի և այլ երկրները։

Այսպիսով, Ասորեստանյան պետության «բարբարոսական ծայրամասում» կազմավորվում է մի բավական ուժեղ ցեղային միություն, որի հետ ասորեստանյան նվաճողները պետք է լուրջ հաշվի նստեին։ Նրանք հաճախակի արշավանքներ են ձեռնարկում հնազանդեցներու ըմբոստ լեռնցիներին։

Երբ մ. թ. ա. IX դարից սկսած Ուրարտուն ընդարձակվելով հասավ նաև Շուպրիա երկրին, ապա այդ երկիրն արդեն այնքան էր յուրացվել նոր ցեղերի՝ ուրումեացիների կողմից, որ Շուպրիայի փոխարեն ուրարտական արձանագրություններում օգտագործվում են Ուրումե||Ուրմե կամ Արմե անունները։ Մարկվարտն⁵⁵ իրավացիորեն նկատել է, որ հենց այստեղ, Arme էթնոնիմից, Խուրրի-ուրարտական -ուր վերջավորության հավելումով, որը մեղական լեզվի ազդեցությամբ դարձել էր -ուրա, ձևավորվել է Armina անունը, որից և ծագում է հայերի՝ հին պարսկական արձանագրություններում և հին հունական գրականության մեջ ընդունված համապատասխան անունը։ Այստեղից կարելի է եզրակացնել, որ տեղական խուրրիական բնակչությանը արմենները ձուլել էին իրենց և ժամանակի ընթացքում տարածվել նրանց բնակեցրած ողջ տերիտորիայում, արևելյան կողմից ընդգրկելով Մշո դաշտը, որտեղով անցնում էր ուրարտական բնակչություն ունեցող տերիտորիայի սահմանը։

Ցեղային միությունը, որն սկզբում կոչվում էր Մուշկերի թագավորություն, իսկ հետագայում՝ Արմե կամ Շուպրիա, կայուն միություն դուրս եկավ, մի հանգամանք, որ պայմանավորված էր Ասորեստանի և Ուրարտուի ագրեսիայի դեմ պայքարի անհրաժեշտությամբ։ Անդրադառնալով իրոկեզների ամերիկյան ցեղին, որը նոր տերիտորիա էր գրավել և գտնվում էր համանման պայմաններում, Ֆ. Էնգելսը գրում է. «Քանի որ այդ մարզը նրանք նոր էին նվաճել, ուստի այդ ցեղերի՝ ըստ սովորության միմյանց հետ միացած լինելը նրանց կողմից դուրս քշված ցեղերի հանդեպ՝ միանգամայն բնական էր։ Այդ ցեղային դաշնակցությունը իր ձեռք բերած ուժի գիտակցության վրա հենված անմիջապես հարձակողական բնույթ ստացավ և... իրեն շրջապատող ահագին երկրամասեր նվաճեց, ըստ որում բնակիչներին մասամբ դուրս մղեց իրենց բնակավայրերից, մասամբ՝ իրեն հարկատու դարձրեց»⁵⁶։ Ինչպես տեսնում ենք, Ֆ. Էնգելսը խոսում է Արմե-Շուպրիա ցեղային միության կազմավորման պայմաններին համանման մի դեպքի մասին։

Սակայն Արմե-Շուպրիա ցեղային միությունը կազմած ցեղերը մ. թ. ա. XII—XI դարերում իրենց զարգացման մակարդակով իրոկեզներից բարձր էին կանդնած։ Իրոկեզների միությունը արյունակից ցեղերի միություն էր և ուներ

⁵⁴ Մուշկերի թագավորության կենտրոնը՝ Մուշկու երկիրը, որը հետագայում ուրարտացիների մոտ կոչվելու է Մուշանի, հայերը հավանորեն անվանում էին Մուշար (ներկ. Մուշար-գաղ լեռների շրջանը), նա ուներ համանուն Մաշաթ (Պտղոմեոս, V, 12, 8) կենտրոնը։ Մուշար (թերևս՝ Մուշար) փշեցնում է Արամայր անվան ձևը։

⁵⁵ J. Markwart, Die Entstehung..., էջ 67։

⁵⁶ Ֆ. Էնգելս, Ընտանիքի, մասնավոր սեփականության և պետության ծագումը, Երևան, 1953, էջ 131, 192։

ընդհանուր լեզու⁵⁷, իսկ Արմե-Շուպրիա միության մեջ մտնում էին ծագումով տարասեռ ցեղեր: Իրանք էին՝ մուշկերը, որոնց անվան տակ այդ շրջանում հասկացվում էին փոյուզական ցեղերը (միսիացիները և մեռնները) և ուրիշ աղգակից ու դաշնակից էթնիկական կաղմավորումներ, ինչպիսիք էին ասորեստանյան այլ արձանագրություններում հիշատակվող ուրումնացիները, այսինքն հայերի հնդեվրոպական նախնիները՝ արիմները, ինչպես նաև կասկեացիները կամ արեշլացիները, որոնք պատկանում էին նախախեթական արիադա-ադր-դեական ցեղերին: Հիշատակված մուշկերը, ուրումնացիներն ու կասկեացիները հանդիպեցին զանազան խուրրիական ցեղերի, որոնք կամ նրանց դաշնակիցները դարձան ընդդեմ ընդհանուր թշնամու՝ Ասորեստանի, կամ էլ հպատակվեցին, դառնալով նրանց հարկատուները: Այսպիսով, «Մուշկերի թագավորությունը» կամ Արմե-Շուպրիա ցեղային միությունը ոչ թե արյունակից, այլ ծագումով և լեզվով տարբեր ցեղերի միություն էր, դա տերիտորիալ միություն էր:

Եթե Հայասա-Աղզին ներկայացնում էր ծագումով և լեզվով իրար մոտ կանգնած մի խումբ ցեղերի կաղմակերպություն, առաջացած մի շարք ցեղերի ինտեգրացիայի հողի վրա, ապա Արմե-Շուպրիա միությունը արդեն ցեղային միություն էր, առաջացած իբրև սինթեզ բաղմազան էթնիկական տարրերի՝ ինչպես տեղական խուրրի-ուրարտական, այնպես էլ եկվոր մուշկերի-արիմների:

Պատմական զուգահեռները ցույց են տալիս, որ տերիտորիալ տեսակետից մոտ, բայց ծագումով և լեզվով տարբեր ցեղերի միության պայմաններում տարալեզվության նման արդելքը վերացնելու համար միության մեջ մտած ցեղերից մեկի լեզուն վերածվում է միջցեղային լեզվի⁵⁸: Մուշկերի ցեղային միության՝ «Մուշկերի թագավորության» մեջ միջցեղային հաղորդակցման այդպիսի միջոց է դառնում արիմներ-ուրումնացիների լեզուն, այսինքն՝ ապագա հայերենը: Այդ երևում է թեկուզ հետևյալ փաստից: Վերոհիշյալ ցեղերի նվաճած տերիտորիան վաղուց ի վեր ասորեստանցիներին հայտնի էր Շուպրիա կամ Շուբրիա անունով, բայց այնուհետև ասորեստանցիներն սկսում են այն կոչել նաև Ուրումու: Հետագայում, մ. թ. ա. VIII դարից սկսած, երբ այդ տերիտորիան նվաճվում է և մտցվում Ուրարտու պետության կազմի մեջ, ուրարտական արձանագրություններում այն սկսում է կոչվել Արմե, Ուրմե կամ Ուրումե: Այս փաստը, ըստ երևույթին, վկայում է, որ հիշատակված ցեղերի մեջ, վերջին հաշվով, գերիշխող դիրք էին զբաղեցնում արիմները կամ ուրումնացիները, որոնց անունով էլ ուրարտացիները, մասամբ նաև ասորեստանցիները, սկսում են կոչել Շուպրիան: Այստեղ մուշկերը ձուլվում են իրենց աղգակից արիմներին⁵⁹: Մուշկերը ևս, ուրեմն, հիմնականում հայերի հնդեվրոպական նախնիներն էին: Այս տեսանկյունով պատմականորեն հիմնավորվում է այն կարծիքը, թե հայերի «սոմեխի» վրացական անվան հիմքում ընկած է «մեսխ»՝ «մեխ» էթնիկական տնրմինը, որը ասորեստանյան «մուշկի»

⁵⁷ Նույն տեղում, էջ 131:

⁵⁸ Նույն տեղում:

⁵⁹ Մինչդեռ Հալիսի հովտում, որտեղ ապրում էր մուշկերի հիմնական մասը, նրանք պայանել էին գերիշխող դիրքը. նրանց զբաղեցրած տերիտորիան՝ Փոյուզական թագավորությունը, ուրարտացիներն ու ասորեստանցիներն անվանում էին Մուշկու կամ Մուշկինի:

և հայկական «մշակ»||«մուշակ» անվանման բարթիլեականացված ձևն է: Այն իր հաստատումն է գտնում նաև բանասիրական առումով⁶⁰:

Այսպիսով, արմենների լեզուն ժամանակի ընթացքում դառնում է ցեղային միության միակ լեզուն: Մյուս, գերազանցապես խուրրիական, ցեղերի լեզուները աստիճանաբար վեր են ածվում հայոց լեզվի տերիտորիալ բարձրանների, իսկ հայոց լեզուն, ավելի ու ավելի հարստանալով, տարածվում է Հայկական լեռնաշխարհի ներքին շրջաններում ապրող ցեղերի մեջ: Ուրարտական պետության գոյացումից հետո այդ պրոցեսին մեծապես նպաստեց նվաճված երկրների բնակչության մասսայական վերաբնակեցումը պետության կենտրոնական շրջաններում, որ լայնորեն կիրառվում էր ուրարտացիների կողմից:

Արմե-Շուպրիայի գոյությունը և հզորացումը մեծ անհանգստություն էր պատճառում ժամանակի հզորագույն տերությանը՝ Ասորեստանին: 1115 թ. Ասորեստանում գահ բարձրացած Թիգլաթպալասար Ա-ը պատերազմ է սկսում բնդդեմ Շուպրիայի, որը պոտենցիալ վտանգ էր ներկայացնում Ասորեստանի «բարբարոսական ծայրամասից» ոչ հեռու գտնվող կենսական կենտրոնների համար:

* * *

Մ. թ. ա. XII դարում հայկական ցեղերը գերիշխող են դառնում Հայկական լեռնաշխարհի մեծագույն մասում և սկսվում է տեղաբնիկ խուրրի-ուրարտական և եկվոր հնդեվրոպական ցեղերի միաձուլումը: Այս ժամանակաշրջանում դեռևս «մուշկական» — արմենական և հայական ցեղերի միջև եղած տարբերությունը չէր վերացել, սակայն հետագա պատմական զարգացման ընթացքը տանում էր դեպի նրանց վերջնական միաձուլումը՝ իբրև մեկ ամբողջական ժողովուրդ:

Այդպիսով, մեզ հասած կցկտուր տեղեկությունները ցույց են տալիս, որ փոքր Ասիայից մուշկերի (փույուգացիների) և ուրումեացիների (արմենների) ներխուժումից հետո (մ. թ. ա. 1165 թ.) Ասորեստանի պետության մեջ մտնող Շուպրիա կամ Արմե երկրում ստեղծվեց հայերի և նրանց ազգակից ցեղերի միությունը, որը հայտնի էր իբրև «Մուշկերի թագավորություն»: Ինչպես Ասորեստանի տիրապետության ժամանակաշրջանում, այնպես էլ Ուրարտական պետության ժամանակաշրջանում, Հայկական լեռնաշխարհի արևմտյան և հարավ-արևմտյան մասերում տիրապետող էթնիկական տարրը արմենական ցեղերն էին⁶¹: Սրանց անունով էլ Մշո դաշտը (հին հայկական Տարոնը)

⁶⁰ Առաջին անգամ այս կարծիքն առաջ բաշեց և հիմնավորեց Ն. Յա. Մառը (Н. Я. Марр, История термина „абхаз“, Сборник статей Н. Я. Марра, „О языке и истории абхазов“, М.—Л., 1938, էջ 51: Գ. Խալաթյանցի այն պնդումը, թե somehi տերմինը ծագում է zuhma (նեսիտ-խեթերեն), suhma կամ suhmu (ակկադերեն) երկրի անունից, որը պաշտպանեցին Բ. Բ. Պիոտրովսկին և Գ. Ա. Մելիքիշվիլին (Г. Халатьянц, О некоторых географических названиях древней Армении в связи с данными Ванских надписей, „Древности Восточные“, Труды Восточной Комиссии Импер. Археол. Общества, т. II, вып. II, էջ 126), առկա փաստերով չի հաստատվում: Ասորեստանյան արձանագրությունների Սուխմե երկիրը տեղորոշվում է Արածանիի հովտում, Բալու բաղաբի շրջանում, որտեղ գտնվում էր Ասորեստանյան տերության սահմանները ներխուժած մուշկերի, այսինքն՝ հայկական ցեղերի թագավորությունը:

⁶¹ Տե՛ս Ս. Տ. Երեմյան, Հայերի ցեղային միությունը Արմե-Շուպրիա երկրում, «Պատմա-բանասիրական հանդես», Երևան, 1958, № 3, էջ 59—72:

և Արևմտյան Տիգրիսի ու Նփրատ-Արածանի գետի ներքին հոսանքի հովիտները (հին հայկական Աղձնիքը) ուրարտական արձանագրություններում կոչվում են Արմե կամ Ուրմե՝ Ուրումե։ Հենց այստեղ՝ Ուրարտուի և Ասորեստանի «բարբարոս ծայրամասերի» ամենաթույլ օղակներում կազմավորվեցին հայկական ցեղային միությունները։ Սկզբնական շրջանում «Մուշկերի թագավորություն» անվամբ ցեղային միությունը կազմող ցեղերը Ասորեստանի հարկատուներն էին, սակայն հետագայում նրանք անջատվում են և իրենց ինքնուրույնության համար պայքար մղում ոչ միայն Ասորեստանի, այլև Ուրարտուի դեմ։ Իր հզորության շրջանում Ուրարտական պետությունը, սկսած Մենուայի (810—786) ժամանակներից, արշավանքներ է կատարում Ուրմե (նույն Արմե-Շուպրիա) երկրի դեմ, բայց այն հաջողվում է նվաճել միայն Արգիշտի Ա-ի օրոք (786—764)։ Արմե-Շուպրիան, սակայն, Ուրարտուին ենթարկվում է ընդամենը 60 տարի (773—714 թթ.)։ Այս ասելով, մենք նկատի ունենք Հայկական Տավրոսից հարավ գտնվող երկրամասերը, որտեղ գերիշխող էթնիկական տարրն էին հանդիսանում հայկական ցեղերը և նրանց անունով ասորեստանյան Շուպրիան սկսեց կոչվել Արմե։ Հայկական Տավրոսից հյուսիս՝ Արածանիի հովտում, նույնպես գերիշխող էին հայկական ցեղերը, որոնք տակավին մնում էին Ուրարտուի թագավորության գերիշխանության ներքո։ Ասորեստանյան թագավոր Սարգոն Բ-ի (722—705) 714 թ. ռազմարշավի ժամանակ Հայկական Տավրոսից հարավ ընկած երկրամասերը ընդմիշտ անջատվում են Ուրարտուից, և այդտեղ ապրող հայկական ցեղերը, ազատագրվելով, դառնում են Մերձավոր Արևելքում բորբոքված բուռն իրադարձությունների մասնակից։ Նույնիսկ Ռուսա Բ-ի թագավորության շրջանում (685—645), երբ Ուրարտուն միառժամանակ հզորացավ, նրան չի հաջողվում վերամիավորել 714 թ. անջատված հարավային ծայրամասային երկրները՝ Արմե-Շուպրիան, Նաիրի-Խուբուշկիան և Արդինի-Մուսասիրը։ Ասորեստանը ևս չի կարողանում ամրապնդվել Արմե-Շուպրիայում և հարևան երկրներում։ Նրա գերիշխանությունը այնտեղ տեղեց ընդամենը քսան տարի (մ. թ. ա. 673—653 թթ.)։ Ամենայն հավանականությամբ, դրանք Ասորեստանից անջատվել էին 653 թ., երբ ապստամբել էր Բաբելոնը, և նրան էր միացել Մեդիան (Մաաստանը)։ VII դարի վերջին Արմե-Շուպրիան, Նաիրի-Խուբուշկիան և Արդինի-Մուսասիրը միավորվում են մեղացիների հետ և համատեղ հարվածներով կործանում նաև Ասորեստանը, ապա Ուրարտուն։

Ինչպես տեսնում ենք, հայ ժողովրդի կազմավորման պրոցեսը հիմնականում տեղի է ունեցել Ուրարտուից դուրս և նրանից անկախ, չնայած նրան, որ հայկական էթնոսի առաջացման գործում մեծ դեր է խաղացել ուրարտացիներին մոտ գտնվող խուրրիական սուբստրատը։ Սակայն անխուսափելի էր հայկական ցեղերի շփումը Ուրարտուի հետ։ Վանի թագավորության էքսպանսիան դեպի արևմուտք և հարավ-արևմուտք հանդիպեց ուժեղ դիմադրության այդ տեղերում բնակվող հայկական ցեղերի կողմից, սակայն ուրարտացիները զինքի ուժով ենթարկում են նրանց իրենց գերիշխանությանը, որից հետո հայ ժողովրդի կազմավորման պրոցեսը ապրում է նոր փուլ՝ սկսում է լայն փոխադրեցությունների մի շրջան հայերի և ուրարտացիների միջև, որն ավարտվում է վերջիններիս միաձուլմամբ հայերի մեջ։ Հանգամանք, որի համար նպաստավոր պայմաններ էր ստեղծել Ուրարտուի թագավորության ներքին և արտաքին քաղաքականությունը։

Ուրարտուն մ. թ. ա. VIII դարի առաջին կեսին իր տիրապետությունը տարածեց ամբողջ Հայկական լեռնաշխարհի վրա, իր մեջ ընդգրկելով հայկական ցեղերի կողմից բնակեցված գրեթե բոլոր տերիտորիաները։ Ահա այս ժամանակաշրջանում հայկական ցեղերը կամավոր և բռնի միջոցներով հաստատվում են Ուրարտուի թագավորության կենտրոնական մասերում, այն է՝ Վանա լճի ավազանում, ապա Արարատյան դաշտավայրում։ Մեզ հասած ուրարտական արձանագրություններից տեղեկանում ենք, որ Արգիշտի Ա-ը (786—764) Ծուպանի (հայկական Սոփք) և Խաթե (Սոփքին հարևան, թերևս նրանից հյուսիս ընկած նախկին Հայասան) երկրներից բերված և այժմյան Երևանի արվարձաններում բնակեցրած 6600 զինվորների միջոցով մ. թ. ա. 782 թ. հիմնում է էրեբունի-Երևանը⁶²։ Այս զինվորները, անշուշտ, հայկական ցեղերից էին, բռնի կերպով այստեղ բնակեցված։ Մի այլ ավելի ցայտուն փաստ վերաբերում է Ռուսա Բ-ի (685—645) ժամանակաշրջանին։ Վանա լճի հյուսիսային ափին գտնվող Արծկե (Ադիլչեվազ) գյուղում հայտնաբերված ուրարտական արձանագրություններից տեղեկանում ենք, որ Ռուսա Բ-ն թագավորը մ. թ. ա. 676 թ. արշավանքների ժամանակ նվաճված Մուշկինի, Խաթե և Խալիտու երկրներից բռնի զաղթեցրել է տեղական ազգաբնակչությանը և բնակեցրել արձանագրության գտնվելու վայրում, որը կոչվել է Զիուկունի երկիր⁶³։

Սակայն հայկական տարրի ներթափանցումը Ուրարտուի թագավորության կենտրոնական գավառները հիմնականում տեղի էր ունենում խաղաղ ճանապարհով։ Այգ ներթափանցումը Արմե-Շուպրիայից և հարևան երկրամասերից դեպի Վանա լճի ավազանը տեղի էր ունենում երկու հիմնական ուղղություններով՝ Վանա լճի հյուսիսային և հարավային եզերքներով։ Հյուսիսային եզերքով թափանցող հայկական ցեղերը թողնում են իրենց անունը, որը հիշատակվում է ասսուրա-բաբելական և ուրարտական արձանագրություններում՝ Aramali, Armarili, Armiraliu ձևերով, իբրև Ուրարտուի կենտրոնական երկրամասի անուններից մեկը և որը պահպանվել է հայ մատենագրության մեջ «Արամայր» ձևով։ Վերջինս, իբրև Արմավիր քաղաքի անվան այլ տարբերակ, պահպանվել է Անանունի մոտ⁶⁴։ Ինչպես տեսնում ենք, տարբեր ձևերով ավանդված այս անվան հիմքում ընկած է «Արիմ-Արմեն» ցեղանունը և ենթադրել է տալիս, որ Ուրարտուի պետության բուն երկիրը՝ Բիայնիլին համեմատյան դեպս VIII դարում կոչվել է նաև Արամալի||Արմարիլի կամ «Արամայրիլի», որ հավանաբար «Արմինա» կամ «Արմենիա» անվան տարբեր ձևը պիտի հանդիսանա։

Վանա լճի հարավային եզերքով թափանցող հայկական ցեղերը նույնպես թողել են իրենց հետքը տեղանունների մեջ։ Մ. թ. ա. 714 թ. ասորեստանյան թագավոր Սարգոն Բ-ի (722—705) ղորքերը Ուրարտուի կենտրոնական մա-

⁶² Г. А. Меликишвили, Урартские клинообразные надписи, 127, II, 33, М., 1960, էջ 214, 216։

⁶³ Նույն տեղում, 278, էջ 341—342։ Տե՛ս նաև նույն հեղինակի Наирн—Урарту, Тбилиси, 1954, էջ 315—316։

⁶⁴ «Սերեոսի եպիսկոպոսի պատմություն», Երևան, 1939, դլ. Ա, էջ 5։ «Արամայր» անվան մեջ «այր» մասնիկը պիտի համապատասխան լինի վրացերեն ջო «էրի» բառին, որ նշանակում է «ժողովուրդ», «զորաբանակ»։ Այս վերջավորությունն ունեն իշ-այր (պիտի նշանակի իշովացիներ) և Մուշար||Մուշայր (պիտի նշանակի՝ մուշկեր-փոյուզացիներ), բառացի «արամ-ժողովուրդ», «իշովա-ժողովուրդ», «մուշկ-ժողովուրդ»։

սերը կատարած արշավանքի ժամանակ անցել են մայրաքաղաք Տուշպա-Վա-նից դեպի արևելք և հարավ-արևելք գտնվող Այազու կամ Այդու երկրով: Վերջինս տեղադրվում է Հայոց ձոր կամ Երվանդունիք գավառի տերիտորիայում, որի հետ են կապվում հայկական ավանդությունները հայ ժողովրդի առասպելական նախահայր Հայկ նահապետի և նրա տոհմի բնակության վայրի մասին: Ինչպես նշում ենք մեր մի այլ հոսվածում, այս հանգամանքը թույլ է տալիս ենթադրելու, որ միջ հետաքրքրող անվան մեջ առաջին Այա մասնիկը կարող էր կարդացվել Haya, և Hayadu կարող է հոմանիշ լինել «Հայք» (որտեղից և «Հայոց ձոր») անվան⁶⁵: Հիշենք ավանդությունը, որը այդ տեղեքումն է բնակեցնում հայ ժողովրդի առասպելական նախահայր Հայկ նահապետին: Վերջինս ճակատամարտով տիրել է այդ տեղերին և «զտեղի ճակատուն շինէ դաստակերտ, և անուն կոչէ Հայք, ...այսորիկ աղագաւ,— շարունակում է զրույցը,— և դաւառն այժմ անուանի Հայոց ձոր... Իսկ աշխարհս մեր կոչի յանուն նախնւոյն մերոյ Հայկայ՝ Հայք»⁶⁶: Այս ավանդությունը հետաքրքիր է առաջին հերթին նրանով, որ հայ ժողովրդի երկրի «Հայք» անունը կապում է Ուրարտուի կենտրոնական դավառի հետ: Այս առաջուցվում է գիտական տրվյալներով: Ուրարտուի կենտրոնի ներգրավումով հայերի ձևավորման ընթացքի մեջ նշանավորվում է հայ ժողովրդի կազմավորման ավարտը:

Արմե-Շուպրիայի և հայկական ցեղերով բնակեցված այլ երկրամասերի տնտեսական և սոցիալական հետագա զարգացումը նախադրյալներ է ստեղծում դասակարգաին հասարակարգին անցնելու, որով պիտի նշանավորվեր հայ ժողովրդի կազմավորման ավարտման ընթացքը: Բնորոշ է, որ Արմե-Շուպրիան ներգրավվում է միջազգային ապրանքափոխանակության մեջ, մասնակցելով երկաթի տարանցիկ առևտրին: Այս էր հիմնական պատճառը, որ Արմե-Շուպրիան հյուսիս-ասորիքյան ու արևելա-փոքրասիական քաղաքապետությունների հետ միասին վերածվում է կովախնձորի՝ Ասորեստանի և Ուրարտուի միջև: Ինչպես առևտուրը, այնպես էլ արտաքին բաղաքական էքսպանսիան արագացնում են նախնադարյան-համայնական հարաբերությունների քայքայման և պետականության տարրերի սկզբնավորման ընթացքը՝ այստեղ ապրող հայկական ցեղերի միջավայրում:

Այս ժամանակաշրջանի Արմե-Շուպրիայում դեռևս զորեղ է տոհմային դեմոկրատիան: Այստեղ ապաստան էին գտնում Ասորեստանից և Ուրարտուից հեղհեղ փոխադրվող տարրերը և առաջին հերթին ասորիկներն ու շահագործվող ազատ համայնական-երկրագործները: Այդ են վկայում մ. թ. ա. VII դարի ասորեստանյան արձանագրությունների տեղեկությունները Շուպրիայի մասին: Մեդհասել է ցայտուն օրինակ՝ կապված Ասորեստանի Սեննախերիբ (Սենեքերիմ՝ 705—681) թագավորի սպանության հետ մ. թ. ա. 681 թ.: Բնորոշ է, որ թագավորին սպանող նրա որդիները՝ Ադրամեելքը և Սարասարը (Շարեցիք), պարտություն կրելով թագավոր դարձած Ասսադիսադդուհի (680—669), փախչում են Շուպրիա: Այս միջադեպը պահպանվել է հայկական ավանդություններում և Մովսես Խորենացու (Ա, ԻԳ) մոտ: Վերջինս հաղորդում է, որ այն ժամանակ, երբ Ասորեստանում սպանվեց Սենեքերիմ թագավորը, հայերին

65 Ս. Ս. Երեմյան, Հայկական առաջին պետական կազմավորումները (VII—VI դդ. մ. թ. ա.), «Պատմա-բանասիրական հանդես», 1968, № 3, էջ 110:

66 Մովսես Խորենացի, Ա, ԺԱ, էջ 37:

կառավարում էր Սկայորդին: Պատմահայրը կոնկրետ նշում է, որ Սենեքերիմին սպանողները ապաստան են գտել «մեկ մոտ», այսինքն՝ Հայաստանում և նշում է, որ սպանողներից մեկին՝ Սանասարին, «մեր քաջ նախնի Սկայորդին բնակեցնում է Ասորեստանի սահմանների մոտ, մեր աշխարհի հարավ-արևմուտյան կողմում: Նրա սերունդն աճելով ու բազմանալով լցրեց Սիմ կոչվող լեռը»⁶⁷: Հայկական էպոսը նույնպես հաղորդում է այդ իրադարձության մասին և Սանասուն կամ Սասուն գավառի անվանումը կապում է Սանասարի անվան հետ, ընդ որում նրանից և Ադրամելեքից է սերում «Սասնա ծռեր» Մհերին ու Սասունցի Դավթին:

Արմե-Շուպրիայի կենտրոնական մասը հիրավի համընկնում էր Սասուն լեռնային բարձրագիր գավառի տերիտորիայի հետ⁶⁸: Ասսուրա-բաբելական արձանագրություններից մեկ հայտնի է, որ Արմե-Շուպրիայի ցեղապետը՝ «թագավորը», նստում էր Ուլումն (հետապայում՝ Ափում) ամրոցում, իսկ րստ հայկական ավանդական տվյալների, Սկայորդին նստում էր Ուլումնից ոչ հեռու գտնվող (և թերևս մեր ժամանակներում Քաղքիկ կոչվող) գյուղի վայրում⁶⁹:

Ստորև կանգ ենք առնելու 681 թ. դեպքերի արտացոլման վրա եբրայական ավանդություններում, որոնք տեղ են գտել Բիբլիայի-Աստվածաշնչի երկու զբր-բերում՝ «Գիրք Թագաւորութեանց Չորրորդ» (ԺԹ, 36—37)⁷⁰ և «Մարգարէութիւն Եսայի» (Լէ, 38)⁷¹: Եբրայերեն բնագրում, հայրասպան Ադրամելեք և Սանասար որդիների փախուստի մասին խոսելիս այն երկիրը, որտեղ նրանք ապաստան գտան, երկու դեպքերում էլ կոչվում է Ararat, որ նույն Urartu անվան եբրայական տառադարձությունն է⁷²: Աստվածաշնչի հունարեն «Եօթանասնից» (Septuaginta) թարգմանության մեջ առաջին դեպքում հիշատակվում է՝ εἰς ἡν Ἀραρὰт, երկրորդում՝ εἰς Ἀρμενίαν, որին և հետևել է հայերեն թարգմանությունը, իսկ վրացերեն թարգմանությունը երկու դեպքում էլ ունի სომხეთი⁷³—სომხეთი⁷⁴ («Սոմխիթի»—«Սոմխեթի»), այսինքն՝

⁶⁷ Մ ո վ ս և ս և ո Ր Ե Ն ա Յ Ի, Պատմություն հայոց, աշխարհաբար թարգմ. Ստ. Մալխասյանցի, Երևան, 1968, էջ 110:

⁶⁸ Б. Б. Пнотровский, Ванское царство, М., 1959, էջ 112:

⁶⁹ Ս. Տ. Երեմյան, նշվ. աշխ., էջ 98, ծան. 28:

⁷⁰ «Եւ դարձաւ Սենեքերիմ արքայ Մսորեստանեայց և բնակեաց ի Նինու: Եւ եղև մինչդեռ երկիր պագանէր ի տան Նասրաթայ աստուածոյ իւրում, Ադրամելէք և Սարասար որդիք նորա հարին զնա սրով և ինքեանք զերթան յերկիրն Արարադայ, և թագաւորեաց Մսորդան որդի նորա ընդ նորա» (Գ. Խադ., ԺԹ, 37):

⁷¹ «Եւ դարձաւ անդրէն զնաց Սենեքերիմ արքայն Մսորեստանեայց, և բնակեաց ի Նինու: Եւ մինչդեռ երկիր պագանէր ի տան իւրում Նասրաթայ կողմ իւրոց, Ադրամելէք և Սարասար որդիք նորա սպանին զնա սրով, և ինքեանք զնացին փոխստական ի Հայս, և թագաւորեաց Մսորդան որդի նորա ընդ նորա» (Եսայի, Լէ, 38):

⁷² Հին եբրայեցիների դրականության մեջ Ararat-ը փոխարինում է ասսուրա-բաբելական Urartu-ին, որը այդ ժամանակ (մ. թ. ա. VIII դարում) ընդգրկում էր գրեթե ամբողջ Հայկական լեռնաշխարհը:

⁷³ Դա იყო ოდეს თაყუანის ცემდა ტაძარსა შინა მესრაქას ღმერთსა მისსა, და აღრამე-ლიქ და სარასარ, ძეთა მისთა მოკლეს იგი მახვლითა, ხოლო თვთ ივლტოდეს ქუცყანასა შინა სომხითად, და მეფე იქმნა ასორდან ძე მისი მის წილ (მეფეთა წიგნი დ, ით. 37).

⁷⁴ Դა თაყუანისცემასა შინა მისსა, შორის სახლსა, ასარას ღუთისა მისისასა, აღრამელიქ და სარასარ ძეთა მისთა, დასცეს იგი მახვლებითა, ხოლო იგინი განრომილ იქმნეს სომხეთად, და მეფე იქმნა ასორდან ძე მისი მის წილ (წინასწარმეტყველება ესაიასი, ლბ. 38).

«Հայք» — Հայաստան: Հայ ժողովրդի ծագման հարցի տեսակետից հետաքրքիր է Հր. Աճառյանի կողմից արված դիտողությունը, որ «Սանասար» || «Սարասար» (հրբ. Šarešer || Sarešer, որից հունարեն՝ Σαράσσα) անունը առնչություն պիտի ունենա Kizwatna երկրի Šunaššura թագավորի անվան հետ⁷⁵:

Խոսելով Սկայորդու մասին, պիտի նշել, որ պատահական չէ, որ նույն Սուսես Խորենացու տեղեկության համաձայն, սրա որդին է Պարույրը («Պարույր որդի Սկայորդու»), որ դարձավ «առաջին պսակաւոր Հայոց», այսինքն՝ առաջին թագավոր Հայոց: Պարույրը կարող էր Հայաստանի թագավոր դառնալ միայն 612 թ. հետո, այսինքն՝ Նինվեի անկումից և Ասորեստանյան թագավորության ոչնչացումից հետո: «Սկայորդի» անվան ստուգաբանությունը կապվում է սկյութների հետ, որ դարձանալի չէ, եթե նկատի ունենանք, որ VIII—VII դդ. ընթացքում սուվորական էին Հյուսիսային Կովկասից կիմերական, ապա սկյութական ցեղերի ներխուժումները, որոնցից շատերը հաստատվում են Հայկական լեռնաշխարհում և Փոքր Ասիայում⁷⁶: Հերոդոտը նույնիսկ նշում է սկյութների 28-ամյա տիրապետության մասին Մեդիայում և հարևան երկրներում (մ. թ. ա. 652—624 թթ.)⁷⁷: Սկայորդու որդի Պարույրը հանդես է գալիս իբրև Ուրարտուի հետ կապված իրադարձությունների ակտիվ մասնակիցը, սկյութների և մեդացիների դաշնակիցը⁷⁸:

Հյուսիսային քոչվորների՝ կիմերների և սկյութների արշավանքները նախադրյալներ ստեղծեցին հին արևելյան բնապետությունների՝ Ասորեստանի և Ուրարտուի անկման համար և նրանց ենթակա ժողովուրդներին հնարավորություն տվեցին թոթափելու ասորեստանյան և ուրարտական լուծը: Պատմության թատերաբեմ են իջնում նոր պետություններ՝ Մեդիան, Հայկական թագավորությունը, ապա Աքեմենյան Իրանի պետությունը:

Մեզ հասած տեղեկությունները հնարավորություն են տալիս խոսելու հայկական երկու թագավորությունների մասին՝ Արմե-Շուպրիան (Եփրատ-Արածանիի ներքին հոսանքի շրջանում և Արևմտյան Տիգրիսի հովտում), որտեղ հանդես է գալիս Սկայորդու դինաստիան, և Ուրարտուի կորիզը հանդիսացող Բիայնան, որտեղ, Ուրարտուի թագավորության փլատակների վրա, մ. թ. ա. VII դ. վերջում—VI դ. շեմքին ասպարեզ է գալիս Երվանդունի դինաստիան: Սրանով հիմնականում ավարտվում է Հայ ժողովրդի կազմավորման երկարատև ընթացքը: Այնուհետև հայկական էթնոսը ծավալվում է Արարատյան դաշտավայրում և նրանից արևելք և հյուսիս-արևելք գտնվող երկրամասերում: Ուրարտացիները ձուլվում են հայերի մեջ: Ուրարտական դինաստիայի անկումից հետո դադարում են խոսել ուրարտական արձանագրությունների: Ուրարտուի փոխարեն մենք տեսնում ենք «Արմինա» կամ «Արմենիա» երկիրը, որը երբեմն հիշատակվում է Ուրարտուի անունով՝ «Ուրաշտու» կամ «Արարատ» (Երեմիայի մարգարեության մեջ մ. թ. ա. 593): Եթե այդ ժամանակ զոյություն ունենար հայալեզու աղբյուր, անշուշտ, մենք կունենա-

⁷⁵ Հր. Աճառյան, Հայոց անձնանունների բառարան, հատ. Դ, Երևան, 1942, էջ 390:

⁷⁶ Տե՛ս Ս. Ս. Երեմյան, Կիմերական ու սկյութական ցեղերի արշավանքները և Ուրարտուի ու Ասորեստանի պայթյալը քոչվորների դեմ, «Պատմա-բանասիրական հանդես», Երևան, 1968, № 2 (41), էջ 89—115:

⁷⁷ Տե՛ս И. М. Дьяконов, История Мидии, М.—Л., 1956, էջ 288—289:

⁷⁸ Б. Б. Пиотровский, О происхождении армянского народа, Ереван, 1946, էջ 21:

յինք հայ-արմենների երկրի տեղական տնունը՝ «Հայք», որը, ցավոք սրտի, ավանդված է միայն հայ գրերի գոյության սկզբնական ժամանակաշրջանից (մ. թ. ա. V դարից)։ Այնուամենայնիվ մենք ուղղակի ցույցմունքներ ունենք, որ Ուրարտուի թագավորության անկումից հետո հազիվ էր անցել 90 կամ 70 տարի⁷⁹, էբբ հանդիպում ենք գրավոր աղբյուրների հնագույն տեղեկության։ 520 թ. Բեհիսթունի արձանագրության մեջ արդեն հիշատակվում է «Արմինա» երկիրը, իսկ նույն այդ ժամանակները առաջին անգամ նշվում է «Արմենիա» երկիրը Հեկատայոս Միլետացու (շուրջ 546—480 թթ.) կողմից կազմած Օլկու-մենեի (այն ժամանակ հայտնի աշխարհի) քարտեզի վրա։ Հեկատայոս Միլետացուց հետո հանդես եկող պատմահայր Հերոդոտը (շուրջ 490—424 թթ.) արդեն հանգամանորեն է խոսում Արմենիայի մասին։ Համարյա վերջինիս կրթության ժամանակակիցն է Քսենոփոնը (շուրջ 430—355 թթ.), որը մանրամասն տեղեկություններ է տալիս արմենների-հայերի կենցաղի և ընդարձակ երկիր Արմենիայի մասին։ Ուրարտուի անկումից մինչև «Արմինա» երկրի առաջին հիշատակությունը այնքան կարճ ժամանակամիջոց է մի ամբողջ ժողովրդի կազմավորման պատմության տեսակետից, որ դժվար է կարծել, թե «արմեն» ցեղանունը կամ «Արմինա» երկրանունը առաջ է գալիս Ուրարտուի անկումից հետո, այն է 610—590 թթ. միջև (մ. թ. ա.)։ Պարզ է, որ Բեհիսթունի արձանագրությունից շատ ավելի վաղ շրջաններում այդ անունը գոյություն է ունեցել, բայց հին-արևելյան գրավոր աղբյուրներում, ինչպիսին են ակկադերներ կամ եբրայերենը, շարունակում են այդ երկիրը և նրա ժողովուրդը կոչել նախկին անուններով՝ «Ուրաշտու» կամ «Արարատ»։

Ինչպես տեսնում ենք, ուրարտացիները մասնակցում են հայ ժողովրդի կազմավորման պրոցեսին, երբ այն հասնում էր իր ավարտին, և վանի թագավորության կենտրոնական մասի ազգաբնակչությունը՝ ուրարտացիները ձուլվում են հայերի մեջ իբրև նրա հիմնական բաղադրատարրերից մեկը։

Այնուհետև տեղի է ունենում հայերին շրջապատող ցեղերի միաձուլման ընթացքը։ Արտաքուստ միաձուլման այդ պրոցեսը արտահայտվում էր նրանով, որ էթնոնիմներ-ցեղանունները ժամանակի ընթացքում դառնում էին տոպոնիմներ-տեղանուններ՝ երկրանուններ, գավառներ։ Օրինակ, որոշ ժամանակից սկսած «Մոկք», «Անձեւացիք» և բազմաթիվ նման անուններ դարձան ցեղանուն լինելուց, նրանք դառնում են տեղանուններ, պահպանելով իրենց նախկին ձևը։

Բուն Ուրարտուում, այն է՝ վանա լճի ավազանում, ուրարտացիները դադարել էին գոյություն ունենալուց, ձուլվելով օրեստօրե ուժեղացող հայերի մեջ և Աքեմենյան իրանի աշխարհակալության տիրապետության ժամանակաշրջանում նրանց մնացորդները Աղաթոնի անունով հիշատակվում են Հերոդոտի կողմից (III, 94), սակայն ժամանակի ընթացքում նրանք ևս հայացան, թողնելով իրենց անունը «Արարատ» անվան մեջ։ Հետաքրքիր է այդ տեսակետից «Խաղտիք» անունը։ Այս մեգրելա-ճանական ցեղը շարժվում է Կուր գետի վերին հոսանքի երկրամասերից և տարածվում մինչև Վերին Սփրատի վերին հոսանքը և այնտեղից մինչև Սև ծովի ափերը։ Այդ տեղի է ունեցել մոտավորապես X—IX դդ. մ. թ. ա.⁸⁰։

⁷⁹ Ուրարտուի պետության անկումը տեղի է ունեցել մ. թ. ա. 610—590 թթ. միջև։

⁸⁰ Տե՛ս Մ. Մ. Дьяконов, Предыстория армян, էջ 119—122։

Հին հույներին նրանք հայտնի էին «խալիբ» կամ «խալդայ» անուններով։ Սակայն հույներից առաջ սրանք դիտարկվում էին ուրարտացիները, որոնք այս ցեղա-
յին միությունը կոչում են «խալիտում»⁸¹։ Քսենոփոնը հազորդում է արմեններին
և խալդայներին։ Ընդհարումների մասին ամառային արտավայրերի համար⁸²։
Հելլենիստական ժամանակաշրջանում խալիբներով բնակեցված տերիտորիա-
ները գրեթե ամբողջապես մտնում էին Փոքր Հայքի թագավորության կազմի
մեջ։ Առաջինը Արտաշես Ա-ն (189—161) էր, որ խալիբներից և նրանց ցեղա-
կից մոսինոյկներից խլեց Կարին և Դերջան զավառները և միացրեց Մեծ Հա-
յքի թագավորությանը⁸³։ Այս ցեղերը այնուհետև հայանում են⁸⁴ և Պլինիոսը
(23—79) գիտի միայն արմենոխալիբների ցեղը (NH, VI, 29), որը ապրում
էր Պոնտական լեռների հարավային փեշերին, Ճորոխ գետի վերին հոսանքի
շրջանում։ Առաջին հայ մատենագիրները (V դար) «խաղտիբ» անվան տակ
արդեն հասկանում են Սև ծովի ափին այժմյան Տրապիզոնի և Քաթումի միջև
գտնվող երկրամասը։ «Աշխարհացոյցը» այս երկրամասում դիտե «Ճանիս որ
են խաղտիբ» ցեղը⁸⁵ և իրավացիորեն նշվում է, որ «խաղտիբը» հայկական
անունն է բարձրակարգ «ճան» ցեղի⁸⁶։ Միջին դարերում վերին նիփրատի հով-
տում խալդայների-խալիբների մասին հիշատակը մնացել էր միայն տեղա-
նունների մեջ, ինչպիսին էր խաղտոյ-առիճը (այժմ՝ Գաղտառիճ գյուղը)։ Նույն
հայացման պրոցեսի մասին են վկայում Կուր գետի միջին հոսանքի գավառ-
ների անունները։ Այս տեղերում երբեմն գոյություն ունեն Աշգուզ անունով
հայտնի սկյութական ցեղային միությունը, որոնցից հայտնի է շակասակ ցեղը,
իսկ նրանց հարեան էին ուտիացիները (οὐτιαι, Strabo, XI, 7, 1)։ Սրանք
հայանում են և իրենց հետքը թողնում են Շակաշեն (Sakasene) և Ուտիբ
(Oiene) երկրանունների մեջ։ Շակաշենը Ստրաբոնը (XI, 8, 4) համարում է
Մեծ Հայքի լավագույն երկրներից մեկը, ինչպես և Ուտիբը, որը դառնում է
Մեծ Հայքի անքակտելի մասը՝ Հայաստանի ամենաբերրի երկրամասերից մե-
կը։ Սյս կողմերը ապրող զանազան աղվանական և կովկասյան լեզուներով
խոսող այլ ցեղերը արդեն հելլենիստական ժամանակաշրջանում ձուլվում են
հայերի մեջ և, այդպիսով, ժամանակի ընթացքում Մեծ Հայքի պետության
բաղաբական սահմանները համընկնում են հայ ժողովրդի տարածման էթնի-
կական սահմանների հետ։ Համահարթման այս պրոցեսը այնքան էր խորա-
ցել, որ Ստրաբոնի ժամանակ (63 թ. մ. թ. ա.—21 թ. մ. թ.) արդեն, ինչ-
պես ինքը հաղորդում է, Մեծ Հայքի ազգաբնակչությանը միավելու (ὁμογενω-
σαι) էր դարձել (Strabo, XI, 14, 5)։ Այս փաստը պետք է մեկնաբանել այն
խոսքով, որ Մեծ Հայքի պետության ազգաբնակչության հիմնական մասը
խոսում էր հայերեն լեզվի՝ տարբեր բարբառներով և խոսվածքներով։ Այս
հարցի կապակցությամբ բնորոշ է, որ մեզ հասած գրավոր աղբյուրները գի-
տեն հայերին հիմք մեկ ժողովուրդ, իսկ հայկական ցեղերը հայտնի չեն։ Ու-
րեմն ցեղերի միաձուլումը մեկ ընդհանուր ժողովրդի մեջ տեղի էր ունեցել շատ

⁸¹ Г. А. Меликишвили, К истории древней Грузии, Тбилиси, 1959, *т. 70—72* и *сл.*

⁸³ Xen., *Cyrop.*, III, 2, 17—24.

⁸³ Strabo, XI, 14, 5.

⁸¹ Г. А. Меликишвили, К истории древней Грузии, *т. 2* 85.

⁸⁵ Ս. Տ. Երեմյան, Հայաստանը ըստ «Աշխարհացոյց»-ի, Երևան, 1963, էջ 103:

⁸⁶ Г. А. Меликишвили, К истории древней Грузии, т. 72.

ավելի վաղ շրջաններում: Հելլենիստիկ և ժամանակաշրջանում արդեն գոյություն ունեցող մեկ միասնական հալ ժողովուրդ՝ իր միասնական տերիտորիայով, լեզվով և մշակույթով:

ПРОЦЕСС ФОРМИРОВАНИЯ АРМЯНСКОГО НАРОДА

Академик АН Арм. ССР С. Т. ЕРЕМЯН

(Резюме)

Эпоха формирования армянского народа делится на четыре периода и соответствует четырем этнокультурным и историческим очагам на территории Армянского нагорья. **Первый период** это время существования племенного объединения Хайаса-Аззи (XV—XIII вв. до н. э.), локализуемого на территории античной Акилисены и долины р. Галис—«Первая Армения»—«страна Мушака» («Мусака» в хеттских иероглифических надписях XII—IX вв. до н. э.). Здесь жили мушки—протоармяны—аримы—урумейцы. **Второй период** был ознаменован вторжением из центральных областей Малой Азии и Хайаса-Аззи (около 1165 г. до н. э.) на территорию Софены и Арзанены мушков и урумейцев. Здесь возникло новое объединение племен, известное в ассиро-вавилонских надписях как «царство мушков», а позже «Арме» или «Урме»||«Уруме». Впредь так называется страна Шубриа||Шуприа у ассирийцев и урартов. Если Хайаса-Аззи представляла собою родоплеменную организацию, сложившуюся на базе интеграции нескольких племен, близких по своему происхождению и языку, то Арме—Шуприа уже была союзом племен, образовавшихся на базе синтеза разнообразных этнических элементов как местных хурри-урартских племен, так и пришлых мушков—аримов.

В этот второй период все большую роль играла языковая общность. Племенные языки постепенно сливались в общем формирующемся армянском языке, сделавшись территориальными диалектами этого языка. Территория расселения этих племен находилась в благоприятных условиях для развития производительных сил. По этим землям пролегла магистральная дорога международного торгового обмена, шедшая из столицы Ассирии Ашшура в Канеш (нын. Кюль-тепе, недалеко от Кесарии Каппадокийской). Армянские племена оказались в районе, богатом железными рудниками и очень рано были вовлечены в торговый обмен. Это ускорило процессы социальной дифференциации.

Далее начинается **третий период** в истории формирования армянского народа—период длительного взаимодействия с государством Урарту. С 860-х годов до н. э. образовавшееся государство Урарту вошло в соприкосновение с этими племенами, которые уже были оседлыми земледельцами и переживали период военной демократии и перехода к ранним формам государственности.

Урартское государство в период своего могущества вело войны против страны Арме (Урме||Уруме), которая была завоевана при царе Ар-

тишти I (786—764), однако урартам Арме—Шуприа была подчинена около 60 лет (в 773—714 гг. до н. э.). После походов ассирийского царя Саргона II (722—705) в 714 г. до н. э. отпали от Урарту страны, расположенные на южных отрогах Армянского нагорья (Арме—Шуприа, Наири—Хубушкиа и Ардини—Мусасир). Позже они подчинились Ассирии, но это продолжалось всего 20 лет (673—653 гг. до н. э.). По всей видимости, в 653 году до н. э. они отпали и от Ассирии. В конце VII в. до н. э. армянские племена, составляющие «варварскую окраину» Урарту и Ассирии, объединились с мидянами и совместными ударами покончили с обеими древневосточными державами.

Период владычества Урарту был ознаменован проникновением армянских племен в пределы бассейна Ванского озера, где находились центральные области урартов. Это проникновение, носившее характер либо насильственного переселения, либо мирного просачивания, способствовало усилению армянского элемента в самом центре государства Урарту.

Процесс становления армянского народа был накануне своего завершения, когда армянские племена столкнулись с государством Урарту. В период наступившего внутреннего кризиса урартского государства начинается процесс ассимиляции самих урартов армянами. Урарту вошло в состав формирующегося армянского народа, как один из его основных компонентов. Особенно заметный вклад внесли урарты в в область культуры. Весьма знаменательно, что армянская историческая традиция связывает происхождение армян с центром урартского государства, с городской территорией столицы Тушпы (Вана).

На этом этапе формирования армян были налицо все те элементы, которые характеризуют народ, конкретно говоря, народ рабовладельческой формации. Здесь, в центральных областях хиреющего государства Урарту, завершился процесс сложения армянского народа. В этот период уже существовало общее название, которым армяне именуют себя и свою страну—Науqh (Հայք), восходящее к одному из основных компонентов, к этнониму Хайаса. К этому же времени относится упоминание об армянском языке.

В формировании народа важная роль принадлежит государству. В период падения Урарту (конец VII в. до н. э.) в Арме—Шуприи выделяется династия Скайорди, один из представителей которой, Паруйр, участвует в осаде Ниневии вавилонянами и мидянами в 612 г. до н. э., после падения которой он был признан армянским царем—«первым венценосцем» Армении. Вскоре (на рубеже VII—VI вв. до н. э.) и в самом центре Урарту власть переходит к армянской династии Ервандуни—Оронтидов.

Урартская письменность, которая удовлетворяла только узкие потребности царского двора и жречества, исчезла вместе с исчезновением урартской правящей династии.

Четвертый, завершающий период в истории формирования армянского народа связан с областью Айрарат, на среднем течении р. Аракс, когда Араратская долина становится притягательным центром армянских племен на пороге их полного слияния в единый народ. Хронологически четвертый период ограничивается рамками VI—V вв. до н. э. Это время кратковременного существования первого самостоятельного Армянского царства и могущества Мидийской державы, которое вскоре сменилось государством ахеменидского Ирана. Армянское царство этого периода распространилось на всей территории распавшегося государства Урарту.

В дальнейшем происходит распространение армянского этноса на всей территории Армянского нагорья, где в эллинистическую эпоху образовалось армянское эллинистическое государство Великая Армения. Страбон, говоря о завоеваниях армянского царя Арташеса I (189—161), отмечает, что в его время все население объединенного армянского государства было одноязычным (*ὁμογλωττοῦς*), что указывает на завершение этногонических и глоттогонических процессов, приведших к окончательному формированию армянского народа.

Слияние местных и пришлых племен и образование в результате этого слияния армянского народа внешне выражалось в том, что этнонимы становились топонимами-названиями гаваров и областей. В период завершения формирования армянского народа в центральных областях бывшего государства Урарту урартов уже не было, а их остатки в лице алародов (в передаче Геродота) продолжали существовать в современной Араратской долине. После их окончательной ассимиляции армянами осталось название лишь области «Айрарат».